

四明談助目錄

第二本西正脉二止

卷三

孔畧錄寶慶志 孔畧龍戰錄簪雲樓禱說

版障嶺採沈嘉則游記又度嶺詩一首汪長文詩一首

外大雷採沈嘉則游記并翠山寺志附楊康簡張文定詩

大雷汪氏述族望表鄞獻表列汪中丞玉 汪山人坦 汪

先生禮約諸傳附屠赤水汪氏芰荷亭詩萬季野竹枝詞

紫巖山廣恩寺錄敬止錄聞志附王伯厚碑記一首

靜水洞錄句餘土音訪謝元暉讀書處詩附齊書謝朓傳

莊家溪錄聞志王鄞江傳王荆公挽詩李萬二公竹枝詞附

四明談助

卷三

目一

門下俞偉陳攄二傳

江村嶺 藤嶺 翠山寺橋 莊家溪橋 畧言規模路逕

武陵山錄成化志聞志附沈嘉則詩三首

聖公山錄聞志朱彥誠神術 聖女山錄聞志附錢志辨證

抱子山翠巖山俱錄四明山志後附吳制相勸農詩詞

翠山寺錄聞志敬止錄翠山寺志附劉德元宋潛溪楊康簡

張文定諸公詩 翠山莊節錄春草堂文約

前凰山後凰山錄聞志 凰畧市水氏述薛千仞鄞獻表

雷峯山烏石山錄成化志敬止錄附句餘土音詩一首

張氏世居錄族望表聞志列張待制邵 觀察祁 提舉郟

顯謨孝祥 樞密孝伯 直秘卽之諸傳

唐鑿山陸鑿山錄 聞志 方廣寺錄 聞志敬止錄

蓮花菴 有上中下三菴舊志俱不載今畧言其概

蔣山錄 聞志附 高萬竹傳 春秋義宗序并 敬止錄採入詩

誠應廟錄 聞志并 魏泉使紀異

高閣山 舊志不載錫山脈自此落洋畧言其概

武陵溪桃源溪錄 聞志附 宋曾南豐明沈蛟門包大中詩

靈泉錄 聞志曹志附 沈嘉則詩二首

資福寺錄 聞志附 沈嘉則金鑑二公詩萬季野竹枝詞三首

桃源王氏錄 族望表聞志桃源書院興廢攷列 桃源先生說

宗正珩 提舉勲 大府正己諸傳附 謝山御書書院額

記胡百藥桃源齋居詩

四明談助

卷三

目二

泥峙堰竺迦碑湖泊碑烏金碑黃梅堰俱錄 聞志曹志

王子讀易居錄 族望表并 延祐志本傳勾餘土音詩

林村杜氏錄 杜長公常 贈公鶚 副使思諸傳

林村蠶事錄 錢志附 勾餘土音詩萬季野竹枝詞

硤石峯 西四明結府治脉之小祖山下有大雷王氏

散人鑿 雙乳泉 謝義士居俱錄 敬止錄聞志

西山章錄 楊文懿公集

鰲山錄 袁進士抗節事王伯厚詩萬季埜竹枝詞

岐山錄 成化志

卷四

四明落洋脉 四明脉自西山落洋進城歷叙沿江古蹟

五嶺 嶺下建資教寺 述 聞志

石塘山 錄 九里浦 石塘李氏 李孝子宗質 李司理十

鑑諸傳 附 沈嘉則詩一首

高橋 錄 高橋戰場 并 建炎事畧 兼 婁寅亮請育太祖後 夏

承毀榜保宗 石守信神兵敗賊等事 附 周鄧山雙樟記

萬李野竹枝詞句餘土音詩鮎埼亭集張循王廟議

高橋章 錄 文學和布政繪給事鎰 太常規 叅政銳 僉

事櫟 訓導載道文學朝銓諸傳 附 楊文懿賀封公詩序

西渡 錄 寶慶志 附 陳本堂詩西渡僧擲詩瓦于水槎尚書事

接待寺 錄 聞志 錄 晉鄧令梁山伯封義忠王建廟事

袁忠臣祠 錄 聞志 兼錄 敬止錄載斷獄遷廟事

四明談助

卷四

目三

吳刺史廟 述 延祐志 兼 碑記 附 王荆公王伯厚萬季野詩

羅品山代父戍邊 錄 樗庵存稿傳

陳家衙陳氏 錄 聞志 列 布政振 僉事壁二傳

半村毛氏 述 族望表 列 布政允宗 工部倫 給事中宏

縣尹國賢 參議爲光 異人來賓 戶部聚奎 文學

雲驚 太學廷謨 贈公雲鳩 逸民玉鉉 處士彤

隱君雷龍諸傳 附 嘉靖志雷異續耆舊集汪應詔傳

廟衙口陳氏 列 殉難縣丞貞 文學翰邦二傳

城西陳氏 其族不一 本堂之後 列 學士樞 侍郎瑜二傳 外

有 逸民應麟 仁和雷 邳州葵 武昌宗問 訓導與

延 徵士觀 孝子思禮諸傳

城西孫氏列 知州紘 御史璋 副使裕 孝廉鏗諸傳

卷五

新河述 聞志并 新按

會別亭述 聞志附 王荆公蘓子美詩并 劉改之詞一首 趙元

老解高麗使詩序一則 駐節亭述 聞志

清涼山 隱仙嶺 海會寺錄 袁清容海會菴記 僧中峯

和梅花詩并 辨 周道人維祚寓記

烏樓陳氏述 族望表列 僉事大章 山人大魯 文學陟

光祿士繡 光祿寺卿士京 都司肇域 道人弼肩

明經赤衷 檢討鴻績 山人本衷諸傳附 光祿士京詩

杲堂序陳太母教子文 勾餘土音弔陳光祿詩

四明談助 卷五 目四

王次翁墓被盜毀述 聞志附 萬季野竹枝詞二首

篠牆採 黃南山三江亭賦序 西壽昌寺錄 聞志

玉和堂李氏錄 節推燧升 公子杜 知縣麟經諸傳

潮音堂井錄 曹志附 塞河新按 張氏慈竹軒採 遜志齋集

馬孝子客作錄 李志 裘義士望亭錄 樗菴存稿

西衙堂陳氏 祠中懸額官爵郡邑志皆不載虛實難定

城西范氏述 族望表列 參政鈔 舍人汝植 鴻臚大澈

文學大捷 縣丞大濩 知府汝梓 知府光遇 知縣

煒 知府光曦 知府光陽 布政廷元 知縣從律

知州從徹 知州永澄諸傳附 城西詩人潘訪岳吳岳生

管道復傳

袁忠臣故居述 袁氏譜序族望表列 忠臣鏞 山長士元

太常珙并 太常逸事 給事珪 尚寶忠徹并 尚寶逸事

謝山跋尚寶行狀 禮部孟悌 行人文顯 通判祖義

主事時選 叅將斌 提學時中 贈公鰲 知府德

達 徵上鈞諸傳附 柳莊花紅袁陶軒先世襍事詩

西臯管氏述 族望表鄞獻表列 刑部思易 光祿大勳 知

府學經 山人檣傳

馬公橋三忠墓述 續耆舊傳附 句餘土音弔董給事詩

灣頭義井述 聞志 北郭外龍怒蕩村述 簪雲樓雜記

郡厲壇錄 曹志 北津堰錄 舊圖經附 袁陶軒雜詩三首

保豐碑述 寶慶志成化志附 新按

四明談助

卷五

忠祐廟述 聞志并 碑記附 萬季野竹枝詞袁陶軒雜詩

北郭堰 諸志不載附 新按

城北葉氏述 族望表列 武畧紳 處士謙傳并 傳後論處士

詩句餘土音詩敬止錄故冊

四明談助卷三

大小雷之脉東行近北者爲三女石門以至大隱葦墓等山其水落姚江慈江已錄于前其東行近南者爲孔輿版障嶺外大雷紫巖武陵聖公抱子再南爲翠巖前後鳳等山其水達莊溪武陵桃源俱出林村分支水出鳳輿市並詳于後而西山脉至五嶺石塘山爲出洋之正脉詳下第四卷

孔輿

此字俗寫諸書皆然宜改作輿字

在大雷山之西有所謂三十六河雖名河而無水俯聽則水聲潺潺人謂四明山之伏流也

寶慶志

孔輿龍戰

陳雲瞻尚古簪雲樓雜誌慈溪城外五十里曰孔輿古刹在焉

四明談助

卷三

一

層樓甚軒敞崇禎甲申夏忽隱雲漲天沙門覩雙龍入樓亟避之風雨驟至聲如轟雷及霽登樓怳然冰雪滿目視之皆白鹽也遠近異之或曰此龍戰也易曰龍戰于野其血元黃孔輿禍立至矣未幾民亂遂赭其鄉

版障嶺

在大雷山之北嶺東水出莊家溪嶺西水合斤嶺水出小皎沈嘉則四明山遊記云踰干嶺西行一大溪東注紆迴不知幾折石齒齒離立水穿罅中行若遊龍走虬雜以杜蘅蘭茝菖蒲射干之屬其源蓋莫測所自淙淙作響東西谷應兩崖山秀麗幽峭行三十里所踰一高嶺山至此皆插漢所謂大雷尖小雷尖相聯絡而起大雷尖一曰南雷此正謝居士隱

處前汪氏居蓋借是名耳始知前大溪源出此嶺之西萬峯千壑若驚濤怒浪擁翠而來嶺西水西行又與一大溪會大溪源蓋出西北斤嶺至小皎南流曲折而至它山入郡城矣溪中有行舟嶺上見西北諸山皆際天遠望極西南向走者岡脊平行約可三四十里雲興霞蔚豈志所謂過雲者耶豈所謂大闌山者耶蓋大闌者取闌截之義志以闌作蘭何居此謂過雲無疑過雲一曰雲中居雲之南者曰雲南雲之北者曰雲北

此說誤別有辨在後

沈嘉則度版障嶺詩

嶠嶺事征邁幽則洽清歡輿穿窈窕境撰策清冷湍流泉瀉紅壁白雲冒山冠獻嶺攢秀黛積谷遐考槃東來鬱波濤恍披翠岱淵岱淵既云邈胡爲矯奔騫迴溪落遠村高岑錯霞鮮力罷不自任躋凌浩軒軒青天鳥道絕何由覲喬佺

汪長文度版障嶺詩

我本山中人與世亦殊調跡希河上隱事訪任公釣每託雲水歡頗愜賞心要開春氣已和杖策凌危嶠威夷一溪駛崩奔兩厓隋竹柏媚幽戶春泉灑丹灶粳粳曉風起寂寂千花照山驚翠濤涌雲殘海波耀扳蘿嵌絕壁據石發孤嘯高天若可捫洞壑杳難眺耽遊賞經奇褰裳竟烟磬從此駕輕鴻永謝世人誚

外大雷

在翠巖山之西隔大溪沈嘉則遊記云買舟至鳳巖口肩輿

入山踰藤嶺渡莊溪又踰江村嶺過翠山寺寺前橋大石跨溪高空谷中有此自壯偉云宋太師張衛國孝伯家所建稍入數里曠焉土田山盤水滙是爲大雷山汪氏世居焉然謝遺塵隱處不在是

巍然特起高出衆岫者大雷山又名南雷汪氏所居在翠山後者外大雷也

釋德介翠山寺志

今大雷汪氏宗族甚繁臨水枕山屋舍稠密懸崖疊駕而上直至山半隔溪望之烟火萬家蟬聯鱗比彷彿杭之城隍山過大雷村山徑漸高有長岡嶺嶺上有菴過嶺有甘潼寺稍北山上有擊天田蛛絲闌翁巖姚坑等處西行通陸家埠

四明談助

卷三

三

明楊康簡公至大雷赴西席之招詩

南雷洞壑此登臨嶺道紆迴萬木侵隱見龍宮飛瀑布參差農舍繞深林干霄綠竹晴如雨蔽日蒼松晝亦陰  
敬室主人眞選勝藏書課讀百年心

敬止錄云康簡有負菴集燬于火僅傳詩四首此其一也

明張文定公詩

十年重到大雷山依舊鶯花白晝間細草遠連春澗綠落梅時點客衣斑流塵歲月人空憶繞逕烟霏鶴未還采徧蘭皋猶駐馬夕陽何處水潺潺

繫舟村市踏平灘纔到山中便改觀一夜雨過鳴澗壑半空雲墮失峰巒人家有徑蒼苔滑蕭寺無僧翠竹寒此日故人

千里隔欲扳高頂望長安

大雷汪氏

大雷汪氏始祖係唐汪忠烈王建今汪氏子孫立神像供奉  
爲宗祠卽尊爲本境之神稱汪王廟

碑記

甬上族表大雷汪氏撫軍都御史玉詩人禮約禮部尚書鏜  
詩人樞共四望 按鄞獻表稱南雷汪氏宏海永樂辛卯舉  
人官副使玉正德戊辰進士官都御史遜得萬歷庚午舉人  
官通判列尚書鏜于烏黯橋汪氏不與大雷同族族望表渾  
而合之誤

僉都御史汪公玉

字汝成慶歷先生洙之後世居大雷山下故號雷峯少沈毅

四明談助

卷三

四

厚重愾然以古聖賢自期正德三年舉進士仕至僉都御史  
撫順天畿內以積勞成疾卒于官得年四十九公與里中太  
宰聞莊簡公淵張文定公邦奇與南湖先生本相友善各勵  
名節時稱爲甬上四君子所著敝篋留稿撫畿奏稿等書藏

于家

詳甬上  
耆舊傳

石孟山人汪仲安先生坦

先生號識環中丞雷峯公子也初爲諸生應省試筮得蠱之  
上九慨然有遺世意因作高尚賦以見志稍以門資歷官藩  
幕非其所樂也遂解組歸先生家在大雷山下距四明在程  
几間構屋山椒爲層階漸躡漸高嘗臨階下俯與樓上人語  
高雲宿棟飛泉夾坐右至者如入仙都洞府先生日吟嘯其

中盡以詩法教其子禮約遺詩石孟集楊伯翼所選定屠長

鄉序之

詳者  
舊傳

汪長文先生禮約

先生後字士咳號石雪大父中丞公玉父石孟山人坦先生少負異才嗜學既三世擅爲文章復從學沈嘉則先生之門得其指授由是名日益重所居曰大雷山房樓上徧置楮筆于左偏開一穴下置容五石大缸使人楫其外每一詩成既書紙熟視良久輒手取掇之投穴中積歲時缸滿家人發戶出紙好事者候得每爭取之稍傳布人間先生所居當四明徑口初嘉則遊四明從大雷入先宿汪氏山房搜討故事先生與同行每至一奇處輒相酬唱嘉則記其首合爲四明遊

四明談助

卷三

五

籍一卷一時詞人競相傳寫屠長卿余君房先生俱爲作序

詳者  
舊傳

屠赤水

隆

汪長文芟荷亭歌

山家樓閣沿溪入複道層階上千級青崕寒嵌丹房深栖鶻巢鷹手可拾夜臥不知雲霧多朝來但見衣裳濕排空一步一崔嵬陡然絕頂孤亭開金沙細湧花源出玉竦橫穿樹杪來亭前日午桐陰隨解衣烹茗焚香坐山花躑躅紅半殘野谷簣簣綠萬个濺濺響水到池平池上田田何芟生斜光冷浸玻璃闊倒影晴窺須髮明一時同遊總寥廓元超名理兼清謔腥風挾雨聞虎羆絕磴將雛下猿獍談宜松外塵尾懸棋愛花間子聲落此時散髮夢羲皇世界不知何處著布袍

方冠意蕭野主者恐是避秦者樊榭人歸霞自青葛元沙冷  
泉猶赭舊是仙都好卜隣把杯共酌松杉下與爾將營采藥  
乎爲余先種桃花也

萬季野竹枝詞

大雷山上隱仙真松檜烟霞好結隣自得汪家賢父子茲山  
不屬謝遺塵

紫巖山

沿江北爲白巖水出車廐南爲烏巖水出莊家溪紫巖水出  
林村

廣恩寺

縣西南五十里宋紹定間越公袁詔爲其父衛公建請賜廣

四明談助

卷三

六

恩崇福額後名廣恩寺敬止錄贈太師衛國公袁昇墓在桃源

鄉林村紫巖

聞志

宋尚書王應麟碑記節

浙河以東山水名天下四明爲最出四明西門至林村行六  
七里曰桃源循源而入虬騰駟奔氣勢奇峭紫巖爲最溪清  
谷窈楸檟鬱茂是爲太師袁衛公之阡公篤厚好善用昌大  
厥家嗣子尹神京于紫巖之陽俶建梵宇聿承先志請于朝  
賜名廣恩崇福秀概環觀甲于諸方松風澗泉與鐘魚相答  
創址鳩役匠成于心則住持僧可仁也雅人勝士來遊而嘉  
歎之惟古者體貌大臣推本德善善積廟祀其祖禰近世又  
卽緇廬寓蓼莪寒泉之思于是錫命以寵靈之蓋君子慎終

追遠無不用其極而遇大臣之禮亦至矣哉夫秉彝好德人之良心釋氏書有大報恩篇言孝與儒合觀于斯者愛敬之心油然而生矣予謂善必有慶如殖斯獲非以徼福也教子以食其報可使爲善者勸一宜書仰飛雲而俯拱木著存不忘于以詔萬子孫勿替引之二宜書披攘經營用力勤刻意專南豐所謂稱學佛者將以勉吾儒也三宜書寺經始于紹定庚寅之孟秋越淳祐乙巳季夏考成是歲之秋可仁請識歲月詔永久遂書其事于右

### 靜水洞

句餘士音大雷靜水洞訪謝元暉讀書處

詩話元暉讀書靜水洞僅見丹山圖詠他無所考

### 四明談助

#### 卷三

七

諸謝遊踪徧浙東釣磯琴屋不可數大雷靜水尤清奇云是元暉讀書處晴嵐夾道瀉瀑流故應釀出驚人句想見搔首問天時瑶草仙葩助詩趣諸謝詩格各入神元暉俊逸尤獨

具唐風亦自元暉開青蓮低首拜白紵輔嗣易行無漢學元暉詩變有唐風趙南

塘句也始安幕下誇晚遇玉折蘭摧東市去何如老向此山住

齊書謝朓字元暉陳郡人少有美名文章清麗解褐豫章王行參軍稍遷至尚書吏部郎兼知衛尉事江祐等謀立始安王遙光朓不肯祐白遙光收朓下獄死

### 莊家溪

在翠巖山之東北聞志云源出大雷山澗合姚家坑之水出藤嶺北會莊家壘水東流經林村市下罌脰湖橋入湖泊河

王鄞江先生隱居

校書郎王鄞江先生致

字君一與慈溪楊先生適杜先生醇爲友俱以道義化鄉里諸生子弟師尊之稱爲鄞江先生仁宗朝舉本州校官辭命不受至和二年又召爲校書郎命至而老疾不起矣王荆公誌其墓曰四明士大夫立言以垂後世者自先生始云

王荆公輓詩

處士生涯水一瓢行年七十尚蕭條老妻稻下收遺秉稚子松間拾墮樵雖有聲名高後世且無饘粥永今朝窮魂散漫歸何處甬水東西不可招

四明談助

卷三

八

李杲堂竹枝詞

慶厯先生重二王諸賢北面盡心降身無五畝堪爲宅遺廟誰知擅一江

詩注王鄞江先生致與桃源先生說並鄞人同郡慶厯五先生之二也

萬季野竹枝詞

先賢自昔半躬耕樂道何須身後名國史但傳四君子明山尙有五先生

詩注宋淳熙時鄞袁正獻燮慈溪楊文元簡定海沈端憲煥奉化舒文靖璘並受學金溪陸文安九淵人稱淳熙四君子宋史有傳前此慶厯時郡有鄉先生杜醇樓

郁主致王說楊適五人咸躬耕樂道時稱慶歷五先生

順昌令俞公偉

將樂令陳公攄

二公里居未詳俱出鄞江先生之門附列於此甬上族望表云俞氏順昌循吏偉爲一望又云旌福陳氏將樂令攄循吏也爲一望

順昌俞公偉字仲寬從學王鄞江先生登熙寧六年進士宰南劍之順昌閩人生子多者皆不舉而劍尤甚公作戒殺子文勸其鄉里全活者千計生子多以俞爲字王伯厚七觀所謂順昌嬰孺以俞爲字斯親息之慈仁也

詳聞志

四明談助

卷三

九

將樂陳公攄字君益游王鄞江先生之門稱爲志學元祐三年第進士紹聖間宰南劍之將樂先是邑沿殘薄之風每家止畜一子公至諭以天性申以令甲自此民無不舉子者邑人立祠祀之錫廟額曰旌福

詳聞志

江村嶺 藤嶺

二嶺各脉大雷之水東行隨山轉南出翠山寺橋復南行隨山轉東卽轉北出莊家溪橋復北行隨山轉東經資福寺前出林村江村嶺在翠山寺橋東其脉自北來盡于南藤嶺在莊家溪橋東其脉自南來盡于北山水雄秀蟠曲異于大小皎平水上下之徑直可徵四明正脉之貴居人以沿山路迂故造二嶺二橋以便出入其翠巖前後鳳等

山自樓罍過峽分出並詳于下

翠山寺橋 莊家溪橋

自鳳罍口入山先踰藤嶺過莊家溪橋莊溪舊無石橋今立五柱四門長石平鋪彷彿北郭之磳橋後踰江村嶺過翠山寺橋橋圓洞跨溪上下百級髣髴西壩之高橋但橋高而狹且建于宋南渡後迄今六百餘年石級爛蝕過半舉步輦确行輒惴惴

武陵山

縣西四十里相傳劉阮嘗采藥于此

志成化

山有棋盤石

聞志

明沈嘉則詩三首

才入青山自可憐秋深風日尚娟娟不知已作重來客明

四明談助

卷三

十

日還家恐是仙紫雲紅霧逐人低樹裏泉聲竹裡雞盡日幽尋歸不得萬山千水夕陽西一宿山中懶出門數家烟火隔前村秋深樹老無紅葉路在青天不可捫

聖公山

縣西四十里壁立千仞其中石室虛明朱彥誠嘗寓此

聞志

朱彥誠神術

朱棣字彥誠鄞人初本江南士子靖康初攜家避難抵鄞之聖公山中有一石室壁立千仞規舍其中忽有老父曰此聖公巖也神人居之上每有金鼓聲毒蛇猛獸守其窟不可往也棣曰吾止平地而遇寇必無幸者匿此中未必死于是棄擔持糒沿崖魚貫而進居旬有五日絕無可怖

者而岡嶺秀出清泚眞仙者所居望巖竇數有異光疑之因梯竹以上得一黑匣緘鏹甚固一劍橫其外啓之中有書與印言役鬼治病之術寇退奉之以去設壇事之自是役鬼神如反掌合沙鄭瓚嘗伺其作法往觀焉見其據案而坐運指于袖噴水于口以桃茆麾使而鬼神自至訊鞠論報若官府然問曰此何法也棣曰非法也周天大數也大衍所謂成變化而行鬼神也成變化者數之方行鬼神者數之圓也

聞志

### 聖女山

簡要志云相傳管公明葬此永樂志于管公注云有管公墓聖女卽聖公之誤志徵亦合爲一聞志云相傳管輅卜穴此山上有隱僊洞及聖女墓錢志辨證云管公明墓無碑碣可

### 四明談助

#### 卷三

十一

攷按輅平原人卒于魏世其時吳魏隔絕恐無緣卜于葬此抱子山

山勢如龍蛇抱子道書云山頭有石室泉如甘露名爲聖水宋時鄭宏得此水飲之遂得長生

四明山志

以上諸山綿連至林

村水口轉北起硤石峯俱大雷東行之正脉其南出分支自翠巖至蔣山高閣山再詳于下

### 翠巖山

有秦皇石版弓箭洞葛仙翁以泥封之遺跡猶存澗水通大洋有魚從海來見丹山詠註有宋參政張孝伯墓

宋制相吳毅夫勸農翠山詩

小隊旌旗上翠巖松風十里鎖禪關水深水淺高低澗春淡

春濃遠近山鄉思猛隨蒼鳥去客心暫與白雲閒天公已是多情煞特把淋頭雨破慳

又勸農翠山沁園春詞

二十年前君王東顧詔牧明州念昔時豪往猶難捭闔如今老大却更遲留四載相望三春又半爲勸村農得縱游田疇事是桑條正長麥穗初抽悠悠身世何求算七十迎頭合罷休漫繞隄旆旆牽連鷁擢喧天鼓吹斷送龍舟翠黛叢邊碧雲堆處一擔擔來天外愁如何好且同斟綠醕自課清謳

翠山禪寺

唐乾寧元年僧思明得邵氏之地建以翠巖名院後累建累燬宋嘉定四年參政張孝伯請爲功德寺賜移忠資福寺額

四明談助

卷三

十二

元時方丈側有軒扁曰雜華世界學士袁文清桷有詩明洪武十五年定名翠山聞志寺前大石橋張孝伯所建宋馮溫舒有興建記舒亶有輪藏記俱見敬止錄

寺在桃源鄉石馬里清泉水村從南雷而起峯者盤谷也山從西出者乃錫山從樓巖過峽起天馬峯又名八面奇峯卽寺之主山 洞山名照山寺之案也山外有小谷曰唐巖巖外有陸巖張孝伯墓原有邵氏居從溪而入小巖上有隱仙巖相傳葛仙煉丹處邵氏右隴乃謝氏封塋塞翁有謁墓詩德釋

介翠山寺志

翠山寺面東寺後隱僊巖下小溪自西而南繞而東與寺左大溪會而出翠山寺橋

元劉德元仁本翠山寺詩

古寺桃源上參公第一禪鳥啼深竹裏花落翠巖前去郭六  
十里開山四百年溪聲流不盡魚鼓永相傳

明宋潛溪濂送毖上人訪空室詩

參禪第一要知宗四海唯聞老恕中白日青天轟霹靂孳狐  
妖魅盡潛踪

詩注無慍字恕中號空室歷參諸方得悟洪武十七年弟  
子居頂住鄞之翠山迎之就養四方叩謁者無虛日十九  
年七月示寂塋于唐畧山

楊康簡公翠山寺詩

深山野寺舊烟雷樓閣高低釋子家百尺危橋聽墮葉千層  
洞壑看流花蒼松漢樹風霜早翠碣秦封歲月賒更有葛元

四明談助

卷三

十三

傳秘術紫泥不復計年華

張文定公與汪汝器宿翠山寺次韻紀事

梵門清對碧溪回更有風流地主陪攜酒松庭看月上烹茶  
石鼎引泉來家聲共纘徽猷緒堂扁仍看秘閣裁一宿山中  
心境別夢隨威鳳入瑤臺夜夢修竹一枝出雲霄之上題詩  
有鳳起雲霄切太清之句次日得

報起復  
四川

翠山莊

在寺左謝閣學三賓之父葬於翠山建莊于此今尚存敗屋  
五間春草堂文約云甲申之亂遷博雅堂書于翠山山寇蠡  
起將長編大冊蘸油爲炬其短小者用實綿甲插架萬籤頓  
時星散卽此莊也顧旣爲封翁墳莊何以但立閣學神像牌

位及忠節公位是不可解

前鳳山

二名九曲鳳凰山又名九彎山相傳昔有鳳凰栖此亦名鳳栖山山上有峯曰鳥賀尖宋王鄞江先生墓在山中聞志

後鳳山

俗稱鳳窰亦曰鳳窰又名下寥山相傳有參寥子植梧桐于山中冀鳳鳥之再至故名聞志

鳳窰市水氏

水桓景泰甲戌進士知縣水之文嘉靖己酉舉人郎中水之東嘉靖庚申選貢通判以上見

鄞獻表提學父子二傳列於迎鳳橋新第下

雷峯山

四明談助

卷三

十四

在縣西四十五里成化志舊有雷峯院宋宣參政敬錄建

烏石山

在桃源鄉統名雷峯有贈少師張邵墓

勾餘土音過張待制墓

白髮歸來三使臣張星獨自落吾鄞一枝爲戀荆花住奕葉長看檟木春岨強丹心寧遽謝委蛇晚節定非眞應憐垂老和陽去惆悵當年雪窖身

詩話制待在朝怵於權相之燄有愧洪忠宣公良可惜也

張氏世居

甬上族望表隱學張氏自總得居士祁始居鄞其兄待制邵晚自金歸亦居焉待制在三使臣之列惜其晚節稍減然終

當列爲一望總得第二其子于湖第三參政衛公第四樗寮  
第五凡五望

贈少師張公邵其先和州烏江人寶慶志作歷陽人建炎初假禮部

尚書使金補其弟祁爲明州觀察推官奉母居鄞卒葬雷峯

因家焉聞志

贈少師張公邵

字才彥登宣和三年上舍第建炎元年詔求直言公上疏  
圖恢復三年金人南侵充通問使屢不可屈北徙於會寧  
府距燕三千里及和議成南歸以敷文閣待制再奉祠卒  
歸葬於鄞桃源鄉之烏石山累贈少師其在會寧人多從  
之學後弟祁下大理獄將株連邵會檜死得免子孝曾字

四明談助

卷三

十五

王叔以大理少卿出使没于金金人知爲邵子尙憐之詳聞志

顯謨閣學士張公孝祥

字安國號于湖觀察祁之子生于鄞縣方廣院之僧房紹  
興二十四年廷試第一考官定秦相孫墳冠多士孝祥次  
之高宗擢孝祥第一而墳第三秦相怒旣知孝祥乃祁之  
子風言者誣祁有反謀繫詔獄會秦亡獄釋遂以爲秘書  
省正字得召對歷進顯謨閣學士致仕詳聞志

四庫全書簡明目錄于湖詩文皆追摹蘇軾詞亦駸駸乎  
近之朝野遺記稱其在建康畱守席上賦六州歌頭感慨  
淋漓主人爲之罷席可以想其氣概矣

陳眉公妮古錄云于湖先生孝伯之兄卽之之伯父也其書師顏魯公曾爲高宗所稱卽之稍變而刻急遂自名家然于湖僅年三十有八而卽之八十餘咸淳間猶存故世稱樗寮書而于湖書罕稱之者

### 提舉張公郟

少師邵之季弟由兄邵恩官至提舉江東路常平茶鹽詳聞志

### 參知政事張公孝伯

字伯子提舉郟之子隆興元年進士第歷官參知政事時韓侂胄方厲僞學之禁公調護勸止得以稍弛是年八月

奉祠歸聞志贈太師封衛國公

### 四明談助

### 卷三

十六

### 直秘閣學士張公卽之

字溫夫號樗寮樞密孝伯之子以父恩授承務郎中兩浙韓運司進士歷任直秘閣學士致仕里居三十年卹貧拯急見義必爲寶祐四年制置使余晦入蜀誣劾閩州守王惟忠棄市公恤其遺孤又使從孫士倩娶惟忠孤女惟忠得以禮改葬及復金壇田皆公之倡義也詳聞志

### 唐輿山

石塘界前雷峯守腰馬嶺冠巔羊巖負輿聞志山前隔溪卽蓮

花菴山後近翠山寺山盡過東落洋爲方廣寺

### 方廣教寺

唐咸通十一年建名泗州院宋治平二年賜今額元至元十

五年日湖處士周塾施田四百二十四畝乃於殿西建祠以祀之聞志後寺圯明正統間塾孫周濂重建敬止錄寺在鳳巖市與林村之資福寺相距二三里

### 陸巖山

其山左獅峯右象峯中蓮花峯有宋待制張邵墓聞志

### 蓮華菴

未詳起于何時有上中下三處從方廣寺右循麓而進下蓮花中殿供佛旁列農具牛房僧衆與牧豎雜處是爲上中二蓮華之田莊中蓮花尚距二里一路溪水潺潺竹木陰森罕見天日石徑數盤突見層樓掛壁若鰲山然入門空翠撲庭嵐光滿室山僧習靜處也上蓮華僻在山巔寂靜孤高遊人四明談助

### 卷三

十七

罕至菴前溪水俱出鳳巖市

### 蔣山

山有丁巖余家洞銀橫洞有龍湫在靈龜洞有高萬竹先生墓聞志山頗平衍其脉自蓮華峯來前後鳳亦有落洋山脉遠近不等

### 高萬竹先生元之

甬上前族望表萬竹高氏太尉瓊之後也萬竹先生爲一望其子孫見後表

先生字端叔武烈王瓊之七世孫也建炎間衣冠南渡因定家于鄞家貧無書得易編口誦不輟數月忘盥櫛鄰生有書深憐之稍借以觀後授易春秋學于沙隨程先生廻

嘗作變離騷九篇集春秋說百五十七卷易詩論語後漢  
歷志解各一卷詩三千雜著五百號茶甘甲乙集貧不能  
葬門人會葬于桃源鄉蔣山買田立祠于寶巖院歲時祀  
之稱曰萬竹先生詳甬上耆舊傳先生舊居南山其後人友文徙  
居東鄉與錢頃同里今地名高錢其宗派也

高氏春秋義宗序

鮎埼亭集

高憲敏公息齋閱曾有春秋集注而端叔繼之故吾鄉稱  
爲春秋二高不以名位甲乙也然端叔之書之博過于息  
齋自予治春秋以來求端叔之書不可得今年鈔永樂大  
典得之爲之驚喜雖頗有殘缺要爲經苑中所當珍惜也  
嘗觀剡源所記謂其先塋在萬竹山中學者因稱爲萬竹

四明談助

卷三

十八

先生然端叔實未嘗久居萬竹其居萬竹之大家爲王氏  
而菲薄端叔之學每端叔至萬竹王氏奉之甚嚴退而卽  
歎其無成惜其徒老以死豈知由今日觀之固有不以彼  
易此者乎端叔之後在明爲陝西撫軍斗樞至今猶以讀  
書世其家

附錄萬竹先生詩五首

敬止錄云萬竹先生茶甘巢今不可得見葉文莊公水  
東日記錄其變離騷一序予抄入藝文攷茲徧覓得數  
詩錄于此

雪竇雲深處相攜到乳泉沙田春事晚山寺野花妍香飯

供南燭丹房托景天山居□□□更欲上風烟

雪竇寺

大晦出小晦過盡山峯翠寒雲抱山石枯枿老湍瀨沿流  
路逼仄當道屋破碎却立重回首瀑布瀉雲背

小晦山

路自崎嶇心自平雲扃無鎖但徐行松風石溜含悲怨中  
有樵夫度嶺聲

小晦嶺

楊花賸得晴光煖榆莢其如世上貧花向喜中看更好分  
明春色解欺人

長汀卽事

危亭上拂烟霞光蒼崖深倒蛟螭穴天河飛來破山翠寒  
入疏林風自發翻珠錯玉無時歇巖前散作千秋雪寒聲  
蕭蕭凜毛髮白雪朶朶翔空滅飛流濺沫入毫端天然一  
詩爲題絕

雪竇飛雪亭

誠應廟

四明談助

卷三

十九

蔣山之北巖有靈鰻能興雲雨鄉人立廟祀之以石巖名宋  
嘉定間攝守程覃禱雨有應奉賜今額

聞志

魏泉使

峴

記畧按鄞志石巖山有龍井能興雲雨山去邑西

南四十里高可千餘丈未至山之椒緣磴而下洞深數丈有  
古藤當道盤錯纏蔓人目爲洞鎖洞行有潭三清徹鑑鬚髮  
兩旁石崖聳屨如巨靈所擘者老口相授有它郡守先仕鄞  
諗其靈異泊郡旱穴庭下象三潭隄祝得龜其中雨輒應因  
以靈龜名焉嘉定間程公覃以憲攝帥一再命錢令相顯躬  
展敬事皆隨得甘澍聞于朝賜廟額曰誠應

高閣山

在九灣之上舊志俱不載山石積疊而起故稱高閣其脉自

錫山來東行轉北經藤嶺起高閣山再轉東出脉落平洋凡桃源水以南建畧水以北等鄉皆高閣山脉

武陵溪 桃源溪

武陵溪在武陵山下自山口至流花橋桃源乃武陵之下流也大雷慈溪畧及石林莊畧諸水皆會于此其流抵西塘河

聞志

凡桃源水以北諸山俱大雷東行之正脉至五嶺石塘山出洋

宋郡守曾南豐鞏詩

來時秋不見桃花空樹寒泉瀉石涯爭得時人見鸞鳳不教身去憶烟霞

明沈蛟門詩

四明談助 卷三

二十

雞犬三家夕桑麻一葉春安知天地外別有古今人

明包大中詩

探幽直入武陵溪樹密烟深百鳥啼拂棹野花人不識穿林亂水路還迷雲山半繞芳亭外茅店偏多曲岸西風物尚餘秦代古家家猶自飯蒸藜

靈泉

一名涌泉在資福寺之右相傳僧智回卓錫取水水應錫而出其源上至下寥山口皆有大小泉穴湧出無窮雖大旱不

竭

聞志

下寥山有泉從地下出勃勃作浮漚雖旱甚不竭名靈泉泉水經雙瑞橋東北至泥峙堰分爲二流一入港至湖泊注石

塘東歷高橋而入郡城一下堰出林村大溪注十字港亦東  
歷望春橋匯而入郡城故桃源鄉賦獨加于他鄉

曹志

### 明沈嘉則詩

四明山武陵水桃花之源何處是山翁指點來一觀秋泓照  
天湛如沚野花斑斑冒綠池迴波冉冉紛蘭芷古云異僧有  
神術卓錫取泉泉卽起高如趺突泉細若星宿海雪花浮動  
散青天銀箭倒穿日五彩嗚呼此說非荒唐吾欲持之問蒙  
莊蒙莊已化誰可語仰面忽睹天蒼蒼卽今十月水勢縮神  
漢不生秋日暴且待桃花春水時拄杖來觀雙洗目

### 又贈何夢川先生詩

何夢川先生希濂字景周居武陵溪上五試棘闈不偶以詩

## 四明談助

### 卷三

二十一

賦陶情沈嘉則當受業焉嘉則有贈詩其畧曰先生講業傳  
東海門下諸生幾人在臣也今爲白髮人回首摳衣五十載  
問奇空作老侯巴蝴蝶飛花夢中采著有夢川集訂補桃花  
廣記

## 資福教寺

唐光啓二年僧志回結茅武陵溪上斷劍峯之麓初名廣學  
改名隱學宋咸平三年改資福大中祥符元年改資壽後爲  
參政宣繒功德寺賜教慈資福額

延祐志

明洪武間僧汶侃重

修有環翠樓歷久漸圯

聞志

## 萬季野竹枝祠

望去西山千萬重諸山個個欲稱雄不知品目誰高下還讓

寧城第一峯 詩話西山最高處名寧城第一峯

西村資福古招提巖岫爲樓嶺作梯門外碧波千澗落簷前  
翠影萬峯齊 曾經西畧弔遺墳大碑高碑盡貴人後代不  
知幾甲第空畱石馬對斜曛

明沈嘉則武陵莊詩

青精作飯紫萸羹飽後微吟水上行不道空山曾有寺隔溪  
風送午鐘聲

金鎰夜投資福寺

捨舟登近陸夜色莽雲松山開忽見寺林靜不聞鐘宿鳥翻  
高樹明星動遠空入門僧未起禪室一燈紅

桃源王氏

四明談助 卷三

二十二

甬上族望表慶歷五先生王氏居其二本自莊溪來鄞江先  
生第一桃源先生第二望春先生第三提舉第四大府亦少  
有清名而以婿于樓氏故遷居廣德湖上率子弟輩爲塞湖  
之倡又著廢湖辨以抗李莊簡公則謬矣今樓楚公廟所謂  
王四太保配享者卽大府也是則可惜也矣深寧先生四明  
七觀猶列大府于舊德吾不謂然王氏共四望 望春先生  
傳見後望春山下

桃源書院

宋鄉先生王說以其家酌古堂爲之教授鄉里熙寧九年神  
宗御書桃源書院四大字賜焉元至正末鄉儒張文海重建  
明天順間再構嘉靖間張發復侵地新建未幾延燬其後官

取民地爲察院撥此地以償遺跡遂泯

聞志

王少卿宅

縣西三十五里桃源鄉宗正少卿王珩所居

聞志

州長史桃源王先生說

宗正少卿王公珩

桃源先生說字應求鄞江先生之猶子受業于門以其學教授鄉里三十餘年熙寧中以特恩補本州長史無田以食無桑麻以衣怡然自得沒後門人舒亶銘之郡庠以先生與鄞江先生致楊先生適杜先生醇樓先生郁並祠謂之五先生子珩字彥楚大觀三年進士仕至宗正少卿年

八十卒

寶慶志

四明談助

卷三

二十三

市舶提舉王公勳

大府卿王公正己

提舉勳爲宗正少卿之從子政和八年進士高宗東巡命爲鄞令終廣東市舶司以廉介自持家人不識舶貨之名與妻薛氏俱卒官所賈人念其廉率錢二百萬爲賻其子正己却之曰吾父以廉直聞雖貧猶能負喪以歸不愧廉叔度也正己凡四典郡亦爲部使者終大府卿秘閣修撰

寶慶志  
參聞志

弟正功以蔭補授官至提刑有廉名

御書桃源書院額

鮎埼亭集記畧桃源書院舊在城西武陵之林末卽王先生酌古堂也迨王氏之裔由林末遷罌湖而書院未嘗移明初

始爲官所有乃移之罌湖獨宋神宗之御書歷七百餘年巍然無恙嗚呼是真王氏之球璧也哉五先生之倡道其三皆以布衣終身卽仕者亦不達而先生獨邀宸奎之賜固異數也桑海歷劫天府金石之藏且不可保而是額乃獨留一若有鬼神呵護之者王氏之子孫其幸爲何如

明胡百藥

桂一

桃源齋居詩

比鄰喜得攜琴好笑語何愁行路難天爲山人開子墨客言幽谷是王官霜飛已失千林翠寒重猶存一葉丹綠酒漸深詩漸老好風吹月墮闌干

泥峙堰 在資福寺東下容三竅以均限靈泉水利北流者出李蘓橋以至水經港東流者出蟋溪以至竺迦堰

曹志

四明談助

卷三

二十四

竹迦堰 在桃源鄉林村杜氏居之東上接流花橋以至泥峙堰水下通積瀆漕以至湖泊溪

聞志

湖泊溪 在四十七都桃源鄉

聞志

桃源烏金磬 舊在四十八都聖女山東北今徙至四十六都翠山莊田者多不便

聞志

黃梅堰 在四十七八都之界以均限大雷水利堰上出烏金磬下出大溪

曹志

西鄉廣德湖雖廢以上諸堰磬皆層遞蓄水每遇桃源水漲可使低田水不至易没高田水不至易竭今皆久廢不治僅存其目有心水利者當復之

王子讀易居

甬上族望表林村王氏容齋隨筆所記講易儒者茂剛是也  
一望

宋王處士茂剛居林村巖壑深處刻意讀書足跡未嘗妄出  
尤邃于周易沈煥通判州事嘗訪之稱其見趣絕出于傳注  
之外氣象嚴重窺其所得蓋進而未已也

延祐志

王尚書應麟

贊曰夢吞三畫韞玉山棲象外繫表捐棄筌蹄心學自得義  
文與稽緒言不傳林深艸萋

聞志

勾餘土音林村懷王處士

不習白茅黃葦學逝將韋布老山村

謂新經

崛興寧須五世授

神助早將三爻吞

皆虞都尉事

超然一笑會太極埽盡諸家付遊

魂都尉以來推絕學苦心若个遯天根

四明談助

卷三

二十五

林村村氏

杜副使思世居林村今橫街頭石坊尚在後遷于管江故鄞  
獻表與族望表並稱管江杜氏諸生懋俊殉難于管江傳見  
三十九卷管江下

杜長公常

字守經逮事王父母與父母靡不曲盡其誠有弟二人篤于  
愛敬里隣稍有不戢事必相戒毋使杜長公知初爲奉化功  
曹移役慈溪後授廣西龍江驛丞有以毒藤自殺誣其怨者  
覆訊竟出之郡守惡其反已成案答焉常曰辨冤而死可矣

答何患耶

詳聞志

杜贈公鶚

字薦夫驛丞常之子賦性端謹篤承孝友隨父任在龍江  
時用兵供億代父催課及父卒崎嶇萬里扶櫬奉母以歸  
以子貴累封員外郎詳聞志

杜副使思

字子睿贈員外郎鵬之子嘉靖丙辰進士授營繕主事歷  
陞出知青州州志久闕思手自纂輯擢副使歷遷福建參  
議罷歸詳邱志孫登益字道岸舉萬歷庚子鄉試授華亭教

諭曹志

鄞獻表又稱杜謨正德庚午舉人教諭 嶠天順甲申進  
士都給事 銓嘉靖壬辰進士知縣

林村蠶事

四明談助

卷三

二十六

明州在唐宋時土貢吳綾交梭綾近惟林村不廢蠶事以生  
絲織成謂之生絹甚佳錢志

句餘土音四明貢物吳綾唐貢

吾鄉布帛最寥寥一純二紵三葛越奉北之慈溪山之苧見開慶志次之枯竹捍草褐鴉青棗紅亦佳物見延祐志未若吳綾夸獨

絕大花璀璨狀五雲交梭連環泯百結交梭大花皆吳綾別名濯以飛

瀑之赤泉蜀江新水不足埒浹月四十有五紅上爲黼座補

袞闕女野光芒燭帝室一自楊使君惠民請改折年來林村  
產謂林村絹報章笑下劣空傳古巷名紡絲南湖名巷絡緯蕭條不足

述吁嗟蠶織日已拙

萬季野竹枝詞

獨喜林村蠶事修一村婦女幾家休織成廣幅生絲絹不數  
嘉禾濮院紬

### 硤石峯

在高閣山之北隔大溪其脉自外大雷來突起高山稱爲寧  
城第一峰直落九腦芙蓉爲城西各名墓之祖山

### 西山 西畧 潘畧

四明支山山足有西畧嶺其北有潘畧嶺西山有邑中巨室  
墳瑩敬止錄邑人指城西面之山統曰西山故延亘頗廣如此

二嶺皆附西山也錢志

### 汪隱君講學西山

汪隱君洙晚年築室西山以講學見杲堂舊傳故汪氏舊居在西

### 四明談助 卷三

二十七

山之潘畧後復遷于大雷至大府少鄉思溫始建第于王家  
墩謝山甬上族望表云西湖汪氏慶歷五先生之外惟汪隱  
君洙亦有慶歷汪先生之目至顯謨思溫而貴莊靖公大猷  
而大汀州彬不附秋壑亦賢矣凡四望今其子孫居雷峯尚  
盛

汪隱君以下傳俱見王家墩隱君墓在潘畧人稱汪神童  
墓

### 散人畧山

近潘畧元時有隱者自號散人居此故名俗訛爲殺人畧敬止錄

西山脉分支過河東行一起白鶴山一起望春山爲進城

脉護沙者詳第三十四卷錫山脉過藤嶺起高閣山落洋至城西南等處爲進城朝沙脉者詳第三十五卷

### 西山雙乳泉

在故資教寺北味甘色白故名襄惠公屠瀟墓在焉聞志從鰲

山菴右進港山南爲謝鑿山北有范氏名墓人稱倒地木星謝義士割地予葬

謝茂字茂之隱居桃源西眺山爲人端謹尙節義鄉人鮑御史忠卒無葬地其從父原祥謀于茂茂曰茂有地陰陽家以爲吉雖千金不易願以葬忠已又割地葬千戶湯文之母兩家各以金酬茂拒不受聞志

### 西山章

### 四明談助

### 卷三

二十八

鄞人于凡舊族必舉其里與姓而屬稱之章氏世居西山人稱之曰西山章有徙郭西高橋旁者曰高橋章而曰西山爲

舊宅楊文懿公集

### 章處士審言

失其字郡志隱逸傳稱此君與陳觀孟顥王育用賢並洪武中高士相與游從賦詠自適不以世事屑意爲一時所

重耆舊傳

### 耕雲處士章戊

字仲喆西山之下皆沃土宜稼處士有宅一區有田一廛以耕讀爲業因榜其堂曰耕雲而自號耕雲處士其爲人質厚莊儉恥言人過雅不信浮屠老子之法其親喪或強

之作佛事應曰地下本無獄也藉有之所治必罪惡小人耳吾父何罪惡而祈免焉君子違其言後幼子貴贈處士爲奉直大夫

詳楊文懿公集

### 章禮部規

耕雲處士之幼子處士督率有法垂沒不怠子亦克承父志正統九年舉于鄉景泰二年成進士歷陞禮部郎中晉少卿贈如其官

同上

### 鰲山

其形似鰲浮水面東對白鶴山西隔田畝小村落卽西山章袁進士抗節

宋德祐二年元兵至鄞遣游騎十八人候于邑之西山資教

### 四明談助

#### 卷三

二十九

寺袁進士鏞悲憤激烈約制置使典郡宗室趙孟傳少監謝昌元共出禦敵二人曰君先往我二入當以兵繼之公遂奮然往說後大軍四集趙謝懼密以兵獻于車厰公失援因挺身接戰自辰至酉力不支爲所擒元將愛其才脇令降公不從元將怒命取瞭箕穴其中加于頸上縱火燎之須髮且盡詞氣愈厲遂遇害寔是年三月十日也屬清明墓祭家人上冢舟回次鼈山聞公死驚悼赴水死者十七人仲子澤民甫六歲亦在溺中僕沈蘭出而藏之黃猛洞土冢裏裹青糍黑飯食之比五日兵退始克還守閭妾利篋笥復投置大水甕中僕朱援出之得免

錢志探蔣景高撰傳

鏞字天與咸淳七年進士元

平江教授士元之祖明太常少卿珙之曾祖

王伯厚西山弔袁進士詩

天柱不可折柱折勢莫撐九鼎不可覆鼎覆人莫扛袁公烈  
丈夫獨立東南方欲以一己力代國相頡頏適遭宋祚移恥  
爲不義戕奮然抱志起誓欲掃欃槍拔劍突前麾手回日月  
光賊勢愈猖獗山摧失忠良嗚呼絕倫志不得騁才長妻孥  
悉從溺枯骨誰爲襄忠烈動天地游魂爲國殤山水倍堪悲  
抱恨徹穹蒼穹蒼幸一息庶幾紀星霜西風白楊路哀猿號  
萬季野鄮西竹枝詞

袁公釋褐卽捐生南史爭傳忠義名愧殺宗臣趙制使背君  
賣友竟何成

四明談助

卷三

三十

岐山

相傳嘗有異鳥集此故名又稱旗山以張循王陳兵于此化成  
志岐山在五嶺之北有萬壽菴饒竹木頗有靜趣五嶺以東  
等蹟詳下卷

四明談助卷四

烏春草言城北有小山受西四明七十洞天之脉其脈之來當自五嶺石塘山落洋北瀕大江南界西塘河經北郭堰入城今錄西塘河以北之山川古蹟事物詩歌如左

堪輿家謂四明之脉自藤嶺高閣山落洋由南郊老龍灣入城者其勢一路動盪爲府治作朝自五嶺石塘山落洋由西郊經北郭堰入城者其氣一路靜專爲府治主結又云西來脉左江右河中有橫河四道脉行三折至灣頭由北郭堰進城今此河爲漑田之計外禦鹹潮內通淡水開塞不一難以深究至言正脈北畔之護沙前自太平三菁後自大關羊額嶺落洋凡上虞餘姚慈谿以至鎮海之候

四明談助

卷四

一

濤山關水口皆自四明本身分出其護沙最爲周密

五嶺

在石塘山之西羣山自南來至此又一束轉東起石塘山

資教講寺

縣西三十里舊名廣德院周顯德元年建宋治平元年賜今

額

志成

有蓮花池其花四色又有雙頭白蓮

嘉靖志

舊在乳泉

山其地讓于屠襄惠公造墳今遷于五嶺之東殿宇佛像屢

經修飾異于諸刹

聞志

宋開封府倉曹陳戴碑記元袁桷修三

門記俱見敬止錄

石塘山 九里浦

山下有石塘磳折而東爲小磳循磳而下爲九里浦以注于

江高下斗懸皆鄞土也小磬之內支流蜿蜒有隸于慈者然  
爲慈者畝不過數頃爲鄞徧于七鄉詳沈蛟門記李尙書康先墓  
在石塘聞志石塘磬之水兩分北出九里浦南入西塘河

石塘李氏

甬上族望表孝子李氏文定公廸之後見誠齋集

李孝子宗質字文叔其先濮州人文定廸之裔孫母展氏靖  
康之亂母子相失者十餘年文叔求之不得行次江州水  
南市中得之遂奉以還居鄞之石塘色養者二十餘年樓  
攻媿銘其墓楊誠齋爲傳而贊之曰非至孝奚而通神明  
非神明奚而得母王深寧贊云烝烝純孝其感以天昔朱  
今李盛事光前綵衣華髮介以耆年孰補南陔章善旌賢

四明談助

卷四

二

聞志

文叔爲宋丞相廸之五世孫監明州大嵩鹽場因卜居焉  
陞遂昌令歷官提舉浙東常平卒年七十三墓在天童山

南壘

詳攻媿集墓志

滁州司理李公十鑑丞相廸之太世孫字季明提舉宗質卽  
君之皇考也以父蔭補官歷陞滁州司理參軍嘉定十四  
年卒墓在陽堂鄉太白原詳絜齋集墓志

沈嘉則循西山麓至石塘卽事詩

郡西流水石爲塘塘上青山是北邙陰徑有霜松葉滑陽坡  
無雨麥苗長溪橋送客秋蒲落野店留人晚稻香立馬墓前  
翁仲老誰來取酒醉斜陽

高橋

其橋甲于一郡舟至此通西壩達大江爲南北往來孔道

高橋戰場

萬季野竹枝詞

高宗航海駐鄞邦會托高橋作戰場却恨元戎輕縱敵復教  
兀朮渡錢塘

詩註城西二十里有高橋宋建炎時高宗避兀朮至鄞曾  
大戰于此

勾餘土音鷲湖古蹟

高橋戰場

西盡鷲湖西周行古戰地鬼火滿青林陰雲增夜氣義俠劉

四明談助

卷四

三

先生攘臂伸大義更聞有神兵飛空助旌旅三江與七堰北  
騎暗趨避一戰已揚威再鼓良亦易豈知懦夫懦不如厲鬼  
厲宵遁固可羞大掠還自利一城遭流血重湖俱鼎沸猶復  
夸元勳十三捷所記儼然冒明馨像設能無媿承平七百年  
野老猶紛詈

建炎事畧

高宗建炎三年十一月己巳車駕駐越州聞兀朮軍已渡江  
宰相呂頤浩奏金人以騎兵取勝今若車駕乘海舟以避敵  
騎兵必不能襲江浙地熱金人亦不能久留俟其退去復還  
彼入我出彼出我入此兵家之奇也帝沈吟久之曰此事可  
行卿等熟議庚午頤浩晚朝奏事帝曰航海之事斷在必行

卿等速尋船遂決計趨四明十二月乙亥車駕幸四明駐蹕州治提領海船張公裕奏已得千舟帝甚喜壬午定議航海命知明州張汝舟爲中書門下省檢正公事以御營使司參議官劉洪道知明州己丑夜諜報金人逼臨安知越州李鄴奏至旦大雨羣臣入朝至殿門惟執政入對帝出鄴奏示之卽自州治乘馬出東渡門登樓船宰執皆從詔以親兵三千人自隨百官有司隨便寓浙東諸郡辛卯御舟次定海縣癸巳次昌國縣丙申浙東制置使張俊自越州引兵至明州已無舟可載奏乞海舟帝賜俊手書許捍寇成功當封王爵俊納俠士劉相如之策遂留揭榜通衢勸諭迎敵士皆思奮俊軍士頗事鹵掠城中居民少遂出城以清野爲名環城三十

四明談助

卷四

四

里皆遭焚劫戊戌金人陷越州己亥奏至行在乃議移舟至台溫以避之庚子御舟發昌國縣先是金人分兵犯餘姚知縣李穎士募兵同把隘官陳彥捍之旁皇不敢進者一晝夜由是上得登舟航海辛丑御舟艤白峰寺癸卯張俊與金人戰敗之先是金人遣兵追襲乘輿至城下俊遣統制官劉寶與戰兵少却其將黨用邱橫死之統制官楊沂中田師中統領官趙密皆殊死戰主管殿前司公事李質率所部以舟師來助知州事劉洪道率州兵射其旁大破之殺數千人四年正月甲辰朔大風御舟碇海中乙巳次台州港口是日午西風忽起寇乘之犯明州張俊與劉洪道坐城樓上遣兵掩擊殺傷大當敵奔走墮田間或墜水俊急令收兵夜金人拔寨

去屯餘姚且請濟師于兀朮丙午張俊令明州西城外民居盡蕪之其意欲赴行在也庚戌兀朮引衆再犯明州俊禦之高橋戰數合慮其濟師遂託以上旨扈從癸丑盡將其衆入台州居民去者十七八有士人率衆叩洪道馬首願畱以禦賊丙辰夜洪道悉府實微服遯與副總管張思正引所部奔天童山所過盡撤其橋民不得濟死者數千人哀號震天城中惟崇節軍馬與惡少僅千人以酒官李木將之己未金人破明州先是金人益兵而來駐廣德湖舊寨前遣老弱婦女運瓦礫填塹植砲架十餘對西門是日以數砲碎城樓守者奔散而出城遂陷甲子御舟次溫州港口丙寅移次館頭先是金人自明州引兵攻定海縣破之遂以舟師絕洋犯昌國

四明談助

卷四

五

欲襲御舟至碕頭風雨大作提領張公裕引大舶擊散之乃去帝引舟而南與金人纔隔一日辛未汪藻言金人爲患今已五年張俊明州僅能少抗奈何敵未退數里而引兵先遯是捐明州一郡生靈而陛下再有館頭之行者張俊爲之也二月乙亥車駕幸溫州江心亭駐蹕丙子金人自明州引兵還臨安初金人旣破明州遣人聽命于兀朮且云搜山檢海已畢兀朮曰如揚州例遂屠其城惟東南角數佛寺與僻巷居民偶有存者城之始破也守者奔湊東南縋城而出或浮木渡江生死相半而逃村落者與賊遇由是遍州之境深山窮谷平時人迹不到者皆搜剔殺掠不可勝數旣去以修職郎蔣安義知明州進武校尉張大任同知明州事安義本越

州剡縣人大觀三年冒明州貫登第以賊敗金人至輒投拜  
盡籍土著寄居姓名以告故金人喜之且授以兩浙轉運司  
印一紐甲申慈谿縣令林叔豹引鄉兵入明州執安義奪其  
印金人十餘在開元寺皆病不能前者叔豹并誅之丙戌洪  
道自台州還屯奉化縣其麾下精卒暴橫市肆邑人蔣璉夜  
集數千人之岳林寺圍洪道將殺之縣丞白彥奎勸洪道流  
其毆人之卒衆乃定洪道復入城斫民家窖藏之物得四萬  
緡以獻州人怨之是日金人自臨安退兵三月辛酉車駕發  
溫州辛未御舟次定海縣縣爲寇所焚帝惻然曰朕爲民父  
母不能保民使至如此四月知明州劉洪道罷貶秩二等依  
舊充御營使司參贊軍事以降授宣教郎直秘閣向子忝知

四明談助

卷四

六

明州甲戌御舟至明州乙亥發明州癸未駐蹕越州戊戌出  
米七千斛賜明州居民爲寇所焚者五月癸卯中書門下省  
檢正諸房公事張汝舟特遷一官初帝過明州汝舟應奉簡  
儉粗能給足至台州而守臣晁汝爲儲峙豐脩論者以爲擾  
民帝曰第以簡儉褒汝州則好惡自明故有是命寶慶志  
勾餘土音甬上饒歌

嵎縣子

詩話張俊高橋之捷旋卷甲鼠竄吾鄉人尙誇其功愚  
矣若慈谿林令君叔豹于張俊旣遜之後舉兵逐賊卒  
正蔣安義之罪而誅之庶乎可以脩鼓吹之一曲以雪

屠城之恥

思陵下殿走張俊棄城逃遂教嵯縣子屠毒遍四郊慈水一  
令君倡義獨號咷女真聞之惧遠颺棄餘鴞吾笑夫已氏乘  
危五馬邀指蔣安義館頭有故君反面弗可朝令君整旆來不自  
伏歐刀而待斃杖下以充城闕梟國殤其少慰白鳥鳴飛濤  
婁縣丞奏請育太祖後

婁寅亮字陟明從永嘉徙居於鄞性剛介才識過人政和二  
年進士爲上虞縣丞建炎四年高宗至越時帝年三十未有  
皇子陟明上書其畧曰先正有言太祖舍其子而立弟此天  
下之大公周王薨章聖取宗室育之宮中此天下之大慮也  
仁宗感悟遂詔英宗入繼大統今有天下者獨陛下一人而  
已屬者椒寢未繁前星不耀孤立無助有識寒心天其或者

四明談助

卷四

七

深戒陛下追念祖宗公心長慮之所及乎崇寧以來諛臣進  
說獨推濮王子孫以爲近屬餘皆謂之同姓遂使昌陵之後  
寂寥無聞恐違天監太祖在天莫肯顧歆是以二聖未有回  
鑾之期金人未有悔禍之意中原未有息肩之日臣愚不識  
忌諱欲乞陛下於子行中遴選太祖諸孫有賢德者視秩親  
王俾牧九州以待皇嗣之生退處藩服并選宣祖太宗之裔  
材武可稱之人升爲南班以脩環衛庶幾上慰在天之靈下  
繫人心之望帝讀之感悟樞密富直柔薦之紹興元年召赴  
行在以其言宗社大計也旣入見擢監察御史二年五月選  
秀王子育於宮中卽孝宗也宋史論寅亮能言人臣之所難  
言而高宗亦慨然從之非君仁而臣直乎秦檜以寅亮直柔

所薦惡之諷言者誣其匿父喪不舉鞫問無實猶坐爲族父  
冒占官戶罷職聞志

夏少尹毀榜保宗

夏少尹承字元茂崇寧五年進士任開封少尹靖康間金人  
陷京師京尹徐秉哲散文榜根括皇族冀以免死公奮身力  
爭潛令諸廂毀其文榜放散拘留之人紹興二年臣寮疏列  
其事未及褒表隆興初命史館編錄姓名追贈左朝議大夫  
寶慶志 甬上族望表夏氏靖康忠臣承爲一望

石將軍廟

在城西望春橋外祀宋石將軍守信相傳建炎間高宗幸明  
州金人追之高橋之戰忽陰霧晝晦見神兵被野有大旗前

四明談助

卷四

八

導號石將軍俄而金人奔駭爲楊沂中所敗高宗得航海故

立廟祀之

聞志

陸康僖瑜碑記按廟故籍王諱守信開封人始與宋祖同爲  
周臣宋代周以佐命功遷王侍御馬步軍副都指揮使鎮歸  
德後破李筠平澤潞加同平章事從征幽州授崇信軍節度  
使兼中書令尋封衛國公薨年五十七贈尚書令追封武威  
郡王謚武烈

石將軍廟雙樟記

春酒堂集

城西石將軍廟左右雙樟陰芘數畝不知年歲應與廟同自  
來矣敷榮映發相爲賓友交柯俯仰互爲恭敬按廟碑宋時  
兀朮追高宗至寧廟神助楊沂中戰勝之樟葉皆爲兵卒云

常風雨夜半燈火斗大縈樹上下棲無鷓鴣時節傳芭薦豆  
莫不徘徊樹下瞻仰嗟歎歲丙申郡治幢艤山木已盡守議  
及二樟里人爭之不能得左先受伐是夜守夢甲而髯者斧  
其項不數日疽裂死右樟以免然右者亦竟自枯不復生或  
曰樟亦有命存焉伐者亡而不伐者亦亡豈非命歟予曰命  
也有性焉夫二樟能爲兵卒以抗金人而不能藉神靈以免  
斤斧固命歟然卒能殺其人以報有性然也而右亦竟自枯  
者豈非五倫內有相爲死之義二樟其亦有倫道矣雖然凡  
物至數百年得天已厚精爽所聚不能遽散必復附之人身  
爲智爲勇以畢昔日之志此亦理之未必無者也或又曰童  
謠有之打六更樟再生且未必竟枯者歟予未能解

四明談助

卷四

九

萬季野竹枝詞

海國鯨波作水神行人競賽右將軍高皇航海還宣力不獨  
陳橋第一勳

張循王廟

宋寶祐五年吳制相潛旣成高橋于其西作新廟肖像祠焉

開慶  
續志

改高橋張俊廟議

鮎崎亭集

高橋之捷爲南渡十三戰功之首又爲四大捷之首而飽掠  
遽去使其君有館頭之行其民被屠尙可言功乎故自明以  
來皆言張俊之廟當毀固也但其時之有功吾鄉而應祀者  
則正不少予謂當改張俊之廟以祀之謹議如左

張俊之自越州至也宿衛盡登舟俊欲扈行就上乞舟上賜手書勉以捍寇成功俊猶狐疑有隱士劉相如不知何所人也故大俠以忠義方勸之且爲畫策俊始揭榜通衢下令迎敵于是有高橋之捷深寧先生以爲相如之功不在三老董公之下其後俊之不終而去夫豈相如之意殆必力爭之而不能得故遂匿影而不復見當祀劉隱君第一

初衛士畏航海欲作亂宰相呂頤浩幾爲所害使其事裂則吾鄉先受其禍其扈從定亂者皆辛統制兄弟也當祀辛統制企宗永宗第二

金人分軍犯奉化李侂董之邵任戢皆奉化之義俠也集鄉兵一千餘人于泉口三戰金人不能入而退於是奉化獨完

#### 四明談助

#### 卷四

十

軍費至萬餘緡皆侂任之事定口不言功至蔡文懿公幼學始得其事於侂孫上言于朝贈三人官並修武郎當祀李董任三公第三

癸卯之戰楊沂中趙密田師中李質皆有功已而皆隨俊走是日力鬪而死者裨將黨用邱橫也當祀黨邱二將軍第四張俊旣走金人直下定海將犯昌國御舟相隔僅一宿耳提領海舶張公裕擊破之於埼頭金人始返使無公裕當其鋒益重國恥而事且有不可知是尤功之大者當祀張提領第五

金人以降人蔣安義爲知州而去慈谿令林叔豹引軍入州杖殺安義盡戮金人之居開元寺者安義本剡人貫明州成

進士降金盡籍明之大戶以獻遂致屠城叔豹之殺之最爲吐氣當祀林令君第六

車駕還明張刺史汝舟應奉簡儉粗完而已及行以汝舟爲中書門下省檢發公事官先是台守晁汝爲儲峙豐備大擾民上特遷汝舟一官褒其簡儉以媿汝爲嗚呼劉洪道更何如哉當祀張刺史第七

右數公者其可謂有功矣而不祀乃祀張俊非所謂蒼黃舛繆者歟他如李顯忠鄭世忠潘迪杜愷張鱗相傳皆以扈從死者其有廟也雖非張俊比然數公反不得祀非吾鄉之闕歟請質之鄉論以爲何如

明席

四明談助

卷四

十一

明州多席草人業於織著名四方曰明席寶慶志建炎三年十

二月浙東制置使張俊與金人戰於明州西門俊見民間多織席遣兵斂取之以重席覆於路金騎踐席上皆足滑而仆

因急擊之斬獲甚衆佛祖統記

高橋章

章氏自布政使繪後科甲連綿爲西郊望族人稱高橋章

章文學和

字致和永樂初徙江南閭右實京師致和年十九爲庠生父已沒念長兄督家政弟尙穉固請自行籍於大興縣受廩安定關內墾荒作圃藝蔬自給暇則教授生徒貲漸裕招從子繪紹從孫鑑至京師躬自訓讀皆爲授室繪鑑皆

登進士一官布政使一官都給事紹舉鄉試人以爲篤行

所致

李志

布政章公繪

正統己未進士河南布政司左布政使

鄞獻表

都給事中章公鑑

字元益恭政公從弟由成化丙戌進士選爲翰林庶吉士歷遷都給事中時同里毛宏與公同在諫垣並有重名京師爲之謠曰毛黃門口章黃門手毛章在朝神驚鬼走其風裁若此詳耆舊傳

章太常規

景泰辛未進士官太常寺少卿

鄞獻表

四明談助

卷四

十二

叅政章公銳

字元德章氏世爲德門公少受致和先生家訓由成化壬辰進士官刑部歷遷湖廣叅政事詳耆舊傳子澤由宏治乙未進士爲知府濟居家孝友親喪盡情事詳聞志

楊文懿公賀章公封給事中詩序

吾邑高橋居郭西當水陸之衝而章氏素以賢雄三世同居好賓禮士自藩臬下逮郡縣與遊士過客鮮不延致冠舄叢於其堂舟輿萃於其門外不啻一雄傳也旣而諸耆英皆凋謝盡家日以落門可設雀羅獨靜菴處士幼孤子立廼能飭躬治產諧鄉鄰下致賓客寢復其家聲迨今則昆弟子姪玉立蘭芳青紫交映赫然冠諸名族矣子鑑以

進士官黃門蔚有聲績攷最推恩封公從仕郎兵科給事中室封孺人偕老並榮諒足賀者吾鄉大夫士以賀詩屬余序之余先大父栖芸先生以道德文學名當時公之諸父暨公與昆弟皆從而執經先父梅讀先生暨仲父見素居士季父韋庵先生與公同門蓋若亢鯉之相益者今梅讀雖贈編修而不及封韋庵有二子方舉進士而未第獨見素封監察御史可與公埒然未及公之富而康也而章氏有自行人至苑馬卿者有自主事至布政使者其考妣皆被贈而不及封封乃自公始用是觀之公之福過于人遠矣

按察司僉事章公櫟

四明談助

卷四

十三

字邦貞號三洲叅政公從孫也嘉靖乙未進士歷仕廣西

按察司僉事所至俱以治行稱詳聞志子瑩隆慶二年恩貢

官江西贛州府定南縣知縣勤獻表

章訓導載道

字長輿沈文恭之甥也以明經爲訓導有詩名亦工于書

法行草淳熟秀雅所著有竹圃集耆舊傳

章文學朝銓

字枚吉康熙乙亥歲貢國博一奎子也章氏自都諫以來世有名臣長輿始以詩起至枚吉族兄有樓林居士錫胤者尤以詩名國博亦從學焉枚吉兄弟得其傳而枚吉酷喜爲香奩之作兼工小令尤翩翩俊人也著有青琅館集

續者  
舊傳

章氏同族 紹正統丁卯舉人 滔嘉靖乙酉舉人

又 木萬歷元年貢士官教諭 一奎崇禎六年舉人國子博士

西渡

望京門西三十里卽西壩通慈谿路管堰洪子存管一十八名月支和僱錢二貫文牛畜原額八頭每月支草米錢一貫文索纜月支三貫文寶慶三年洪子存者一十三名牛存一頭舟上下甚艱守胡榘買牛增人按月支給寶慶志

宋陳本堂著入京到西渡詩

昨宵北渡今西渡係是離家第二宵詩伴風流勤犯驛權郎

四明談助

卷四

十四

醉飽健迎潮丈亭浦近隣舟接筆架峯迷故里遙得意歸來期可數榴花如火照高標

西渡僧擲詩瓦

冰槎之被逮也舟次西渡有和尚突擲一瓦于舟疾行而去其外有紙裹之紙上有詩今僅傳其二句云此行莫作黃冠想靜聽先生正氣歌冰槎笑曰此王炎午之後身也然此和尚究莫知爲何所人吾鄉遺民爭物色之不可得亦異人也

續者  
舊傳

接待教寺

城西十五里宋大觀間與國寧寺先後互建蓋國寧之子院也明永樂間兩寺俱廢久之貴家侵爲墳基 國朝順治五

年別建國寧于高橋之東南康熙間圓空重建接待于舊址

聞志

### 義忠王廟

在接待寺西祀東晉鄧令梁山伯安帝時劉裕奏封義忠王令有司立廟祀之

嘉靖志

晉梁山伯名處仁家會稽少游學道逢上虞祝氏子同往肄業三年祝先反後二年山伯方歸訪之上虞始知祝氏九娘子也名曰英臺悵然歸告父母求姻時祝已許鄧城馬氏弗遂山伯後爲縣令嬰疾弗起遺命葬于鄧城西清道原明年祝適馬氏舟經墓所風濤不能前英臺聞有山伯墓臨冢哀慟地裂而埋璧焉馬言之官事聞于朝丞相謝安奏封義

### 四明談助

#### 卷四

十五

婦冢勒石江左至安帝丁酉秋孫恩寇會稽及鄧妖黨棄碑于江太尉劉裕討之山伯託夢于裕以助夜果烽燧熒煌兵甲隱見賊遁入海裕奏聞于帝帝以神功顯雄褒封義忠神聖王令有司立廟焉

節聞志兼李茂誠記

### 袁忠臣祠

祠祀宋咸淳進士忠節袁鏞在城西水仙灣

聞志

祠舊在月湖

全謝山袁公祠碑記見湖心寺舊祠下

宋袁子誠二女買田三百四十畝於湖心寺爲廣生田及創行堂等屋寺僧因於殿後立祠祀子誠每歲忌辰集袁氏子孫祀之以爲常嘉靖間尙書張時徹廢寺以爲己書院袁氏勢衰爭之不可得時爲構訟直至天啓間垂六十餘年矣袁

氏訟於御史田惟嘉不言祀子誠言祀忠臣鏞以聳其聽乃斷以償價若干另造祠宇遂置於此而守王念祖因肇祀焉垂爲祀典取費同賀監祠

敬止錄

### 吳刺史廟

城西九里堰唐大歷間刺史吳謙所築有善政郡民歆血而祀之宋王荆公宰鄞詣祠奉祀

延祐志

吳侯諱謙字德裕官水部員外郎史策軼其傳郡乘缺其蹟遺愛在民歆血奉嘗春秋蘭菊悠久弗懈語見王尚書應麟碑記今名澤民廟亦稱吳使君廟

### 王荆公詩

山色湖光一樣清桑麻穀粟荷君情至今民祀年年在莫負

### 四明談助

#### 卷四

十六

### 當年歆血盟

### 王伯厚詩

城西有祠臨水涘翠松列植路如砥問之耆老此爲誰唐大歷中吳刺史刺史爲民開陂湖故蹟猶傳堰九里年年簫鼓報豐穰決渠爲雨潤澤美遺愛有橋名懷恩姓名不載太史氏昔漢吳公治第一列傳寂寂名無紀刺史豈其苗裔歟明州政亦河南比堂上大書荆公詩蘭菊春秋百世祀地志祇稱王長官有功於民蓋一揆吾聞是邦多賢守裴王碑字顏與李惟侯盛德著人心彼石可焚祠弗圯廣德湖爲鴻隙坡召棠樂社誰敢毀杭稌充羨侯之賜廟食長存如此水

### 萬季野竹枝詞

刺史祠前古木稠烏啼蟬噪景逾幽千年唐社知何在不敵  
江鄉一郡侯

### 羅畫師代父戍邊

羅岳字品山其父綱文以寫真擅名品山亦工其枝兼善墨  
竹康熙三十八年浙東大饑而越郡尤甚販舟相屬米日昂  
里民因私禁出境巡道某謂遏糴非古吾統三郡不宜分彼  
此檄別駕運米以往夜泊西成橋民以爲商舟也聚衆截留  
沉其舟於河別駕跳而免奔訴上官捕繫數十人品山亟白  
於官願代父庭訊得實爲首者置重辟而戍數十人於邊品  
山得鐵嶺衛時奉天尹爲蓮山廖公知其以代父至優禮之  
由是得周覽山川嘗騎白驪衝雪至蓋州遇獵者招飲卽踞

### 四明談助

#### 卷四

十七

地炙鮮拔佩刀割啖衆驚顧以爲何處得此南蠻子詢知始  
末因共傳客焉後遇赦歸年已五十餘父尚在盡色養復數  
年每爲人畫竹必題詩其上率意直書時有佳者年七十六

卒

蔣樗  
菴集

### 陳方伯宅

縣西城外古陳家衙布政陳振所居聞志今方伯祠在新河橋  
之西面大河據其後人云舊宅卽在左近

### 布政陳公振

字時起成化十七年進士由監察御史轉福建按察副使  
不附劉瑾以山東右布政使致仕歸諸政績見郡邑志

又陳氏

四川僉事陳公璧

字天瑞少孤力學正德十二年進士出知滁州歷轉河西僉事先是布政梁宸坐附逆濠論死當道意欲寬之公不果釋乃改調四川罷免詳見郡邑志

半村毛氏

毛氏世居桃源上之烏巖自明初都水公徙居郡城西置田築室自號半村居士今其子孫有居後河者稱椅子漕毛氏甬上族望表云城西毛氏自烏巖來給事中宏監軍兵部員外聚奎共二望又嘉靖己未叅議爲光  
布政毛公允宗

洪武三十年丁丑科進士由學士出爲山西右叅政

鄞獻表

四明談助

卷四

十八

工部毛公倫

字有倫洪武二十七年應薦入覲授工部都水司員外郎因母老乞侍養賜歸孝誠益篤及母沒喪葬如禮不復仕進一時咸推重之

聞志

都給事中毛公宏

字士廣都水公之曾孫中天順元年進士歷進都給事中公在諫垣時當成化初上每見公疏輒曰昨日毛宏今日毛宏然終用其言公直聲日震太后欲識其面垂簾見之宮人俱呼爲毛秀才前後執諫諸事俱詳明史并耆舊傳從弟箴成化甲午進士任江西臨江知府著有耐軒集子驊宏治甲子舉人任河南汝寧府光陽縣知縣從子益正

德庚午舉人知江西建昌府廣昌縣俱有惠政民祀以祠  
詳聞志

縣尹毛公國賢

字正之號峩山廣昌令益之次子也嘉靖戊子舉人官江  
寧縣尹事詳三補耆舊傳子順積上林苑監丞

叅議毛公爲光

嘉靖己未科進士官福建副使

邑志選  
舉表

毛異人來賓

號岐陽都諫六世孫生而倜儻負奇多巧思善製沙漏以  
定晷刻邂逅一僧異其術以追魂法易之其法于密室中  
潔壇坵薦牲牲香帛置繪具几上閱四十九晝夜能令神

四明談助

卷四

十九

將驅攝亡魂追摹形貌無不肖異人得其術未嘗輕試  
偶之雪中爲閔氏繪其先父母像見者驚其如生不數月  
致數千金而歸同里謝行人于宣在京被闖賊掠死其父  
象三延請談壇追攝及期而素箋十幅細書皆滿凡生平  
歷家事瑣屑有人所不能知者縷縷曲盡其神異如此  
王昊廬宗伯爲撰異人傳紀其事後懼驅役鬼神遺子孫  
禍取書盡焚之其術遂不傳

聞志

今其後人猶傳銜光一術凡失物不明者可將失物時  
日禱告作法卽現出竊人狀貌并來去交遞形迹其法  
于淨室中掩閉窻門使不通外光以方桌一張安放室  
中桌上再側加方桌一張桌面向內貼白紙一方設香

燭于白紙前燭光照耀白紙卽向紙恭揖燒符念咒召神以手掌染香烟摩于紙上隨摩隨念久之小兒環視者先見紙內有光後復漸漸現出屋宇人物路逕凡竊物情節以及交接喜怒形狀無不一一現出然小兒中有見者亦有不見者并其法亦有驗者亦有不驗者陰陽之道不可意測

### 毛戶部聚奎

字象來一字文垣都給事中宏之後爲人慷直有節概少與其弟聚璧並有名時稱西臯雙鳳明末諸公起義公從錢忠介公至瓜里軍授戶部郎司餉六狂生之一也所謂六狂生者董公志寧王公家勤華公夏以戊子謀翻城應

### 四明談助

#### 卷四

二十

翁洲不克家勤夏死之志寧逃入翁洲辛卯城陷死之張公夢錫在山寨庚寅寨破死之陸公宇燝應海上逮死惟公雖被逮亡命十餘年家人亦莫知所之及老病歸卒于家著有吞月子集續者舊傳公詩古文詞皆倔奇顧其家人不能收拾有方石銘輿人皂人丐人傳周乘六自序卷跋三篇文存于鮎埼亭集毛戶部傳中又有孽狐傳刺甲申改節諸臣存續耆舊傳中

### 毛文學雲鷲

字公息異人岐陽之長子以節義自持兵燹後絕去仕進遊歷海內晚年著有四書講義勸世格言諸書行世三補舊傳

傳

毛太學廷謨

字涵文號澹齋文學雲鷲子自幼穎異好拯人疾苦里中稱盛德焉子德建德邁俱諸生德達康熙辛卯舉人

詳三補耆

舊傳

贈戶部郎毛公雲鵠

字公儀異人岐陽之次子性樸茂淹貫經史值兵燹隱居水僊灣事九旬母色養不離兄弟五人友于之聲達于里黨遇有義舉必身先之

曹志

子三彰太學生彬康熙壬子副

舉俱積學砥行工詩季子覲文以例任戶部郎中

三補耆舊傳

毛逸民玉鉉

字象節號醉翁事親得懽心篤於天顯肫肫友愛兵燹後

四明談助

卷四

二十一

隱居西郊酷嗜詩老年失視猶口吟不輟著有筆隱集十

三卷

三補耆舊傳

毛處士彤

字欽文酷嗜古學嘗從陳怡庭萬季野諸前輩講習經史貧不能具饗飧悠然自適今僅存殘稿數篇

三補耆舊傳

毛隱君雷龍

字二爲一字淇園西臯六子之一也少有文名丙戌後絕意仕進日與二三知己飲酒賦詩放浪山水間善于解紛鄉族或有爭訐得翁一言而釋所著有翠筠集二十卷

續耆

舊傳又有桂軒詩稿

聞志

附汪君應詔傳

西臯六子中有汪隱君應詔字伯徵少與毛象來同學丙戌以後爲遺民著有猶存草象來序之畧曰汪子少工詩已而挾詩而遊詩日益富貧日益甚歸而卜室大江之澚室修廣方丈方丈以外田夫所都鉏犁雜還汪子不得而有也負壁設木榻一榻右布几竅牆爲窗置坐具讀書其上風清月朗汪子則沿江散步且步且吟且笑宿鳥驚噪雞犬聲亂籬落間牧童饁婦皆出視汪子則大快吟笑自若一日訪予皆春軒酒酣狂發曰嗟乎古稱詩能窮人汪子一窮至此予曰汪子不見圈豕者乎滌牛者乎使汪子蚩蚩作此中物誠無所苦亦何所樂乃于天地間而得爲人于人而得爲中華男子于男子而得工爲詩而又

四明談助

卷四

二十二

得逍遙自賞于江山風月之下天生汪子如是則亦可矣

汪子大笑因令予書其所著猶存草上

續者舊傳

毛氏同族 泉成化甲午與兄箴同榜舉人官知州 鵬成

化癸卯舉人官教諭 大坤萬歷丁亥恩貢官知縣 志

淳崇禎庚午辟薦官同知 坤元康熙壬午歲貢 坤義

康熙壬午副貢 坤至雍正甲辰歲貢 永燮乾隆壬戌

進士官江西道御史 昇乾隆癸酉舉人官福建連江知

縣 烜嘉慶戊午舉人

毛翊家雷異

宏治庚申夏鄞縣西毛翊居樓上見雷火從樓北壁隙入輪轉于前火光燄燄翊悚然曰敬天之怒須叟轉于樓下

無室不然舉家驚愕傭人病者尋愈

嘉靖志

殉閩難陳僉事居

在西成橋之東廟衙口其族本微

殉難縣丞贈僉事陳公貞

字吉人號介麓由監生授上饒縣丞康熙十三年耿逆兵陷南豐公被執不屈囚于福州十五年賊聞王師南下

遂絞公于市事聞贈江西按察司僉事賜祭葬并錄其一

子入監所著有游歷草

聞志

子金斗襲蔭知縣兩任廣四之

永福荔波

三補者舊傳

陳文學翰邦

字令裔一字夢竹介麓公從弟性嗜學弱冠入庠工詩古

四明談助

卷四

二十三

立言有體著有授經堂雜組幻影編年

三補者舊傳

城西陳氏

甬上族望表城西之陳共傳有三十六宗莫能考也其中本堂先生之後蓋最大者翰林學士樞一望

本堂之先尚書顯隱居蜜巖四傳至本堂隱居奉化三石學士乃本堂之孫後亦居奉化其自本堂以上列傳俱錄于蜜巖陳氏下

翰林學士陳公樞

字子經秘書監著之孫父泌

一作必

元饒州教授表章家學

訓釋惟謹學士自束髮受書卽思宏前人之業上論盤古

至高辛以迄于宋比事較義尊正統以定大分紀年則本

司馬補遺書法則倣文公綱目名曰通鑑續編洪武初官翰林學士坐事論死曹志通鑑續編二十四卷通鑑前編舉要新書二卷宋史辨一卷治平類要十篇俱戴九靈爲序其類要篇目述君道第一述任相第二述馭將第三述用人第四述愛民第五述足食第六述制兵第七述慎刑第八述遠佞第九述納諫第十戴序俱載錢志

都公譚纂云四明陳子經在勝國時嘗作通鑑續編書宋太祖廢周主爲鄭王舊編書宋太祖奉周主爲鄭王今易爲廢雷忽震其几子

經厲聲曰老天便打折陳經之臂亦不換矣後三日子經因晝寢夢至一所類王者居有人入報陳先生至矣其中坐者衣黃袍起坐待之曰朕何負于卿乃比朕于篡耶子

四明談助

卷四

二十四

經心知其宋祖對曰陛下欲臣死卽死耳史貴直筆不可易也遂驚悟後爲我太祖所戮硯雲甲編

陳侍郎瑜

侍郎爲本堂之孫學士之姪洪武乙丑進士官至刑部侍郎見南山僉事集中結埼亭集外編

又陳氏

甬上族望表又陳氏行人司行人畸一望

陳行人畸一作琦事無所見

又陳氏

以下諸陳里族未詳附于城西諸陳之後

逸民陳純德先生應麟

字天祺淹貫經史又精于歷數人號通儒一日乘馬出有失馬者前認之先生問曰子亡馬幾何時曰踰月矣遂以馬與之其實先生有馬數年矣明日失馬者馬從別得乃詣庭謝過先生笑遣而已至元間徵仕不起賜號純德先生事見成化志

陳仁和雷 陳邳州葵

陳邳州葵字朝陽父雷素有經濟才疏謁高皇帝一見奇之擢知仁和縣尋卒朝陽少孤食貧永樂五年由知縣遷邳州知州民戴之若父母焉

詳嘉靖志

陳武昌宗問

宗問名裕以字行登洪武二十四年進士歷吏部出守武

四明談助

卷四

二十五

昌奏楚府侵占民地被譴踰年復職而卒事詳成化志

陳訓導與延

與延名延以字行記覽該博尤熟于春秋洪武二十七年薦授本邑訓導開廸後學當時從游之士率知敦尚古道

云成化志

陳徵士觀

字孟顥號我生丰儀俊爽胸次灑落儼然神仙中人郡大夫累辟不起永樂間召寫五經四書性理大全書成勅銓用乃引年乞歸與名卿碩儒賦詩講道以自娛

聞志

又陳氏

陳孝子思禮

字用和七歲父德祥沒母石氏守節自誓嚴督其子以學  
孝子肆力誦讀母年五十五疾卒被髮狂號欲自刺久而  
稍釋服闋入郡庠洪武六年貢入太學事詳聞志

城西孫氏

甬上族望表城西孫氏叔明一望

叔明事迹未見續耆舊集李職方文靖傳後云先生有姻家  
孫序字叔明亦多學顧著述無存者恐卽其人

又孫氏

甬上族望表又孫氏不知何支成化壬辰御史降知廣德州  
紘一望又正德辛未御史璋又嘉靖丙戌副使裕

御史降知州孫公紘

四明談助

卷四

二十六

字文冕成化十四年進士宏治初爲南京御史忤中官陳  
祖生被逮赴京論鞫謫廣德知州卒于官詳見嘉靖志

孫御史璋

字 知廣德州紘之從子正德六年辛未科進士官至  
監察御史亦以政績聞

曹志

孫副使裕

字 嘉靖五年丙戌科進士官江西副使

選舉表

海會寺

巷口有石坊現存

又孫氏

孫孝廉鏗

字允廉母徐氏方娠六月父珂往商于陝旣而鏗生父久

客不返徐鞠且教之稍長日記千言領宏治二年鄉薦時  
年二十一其姑氏令俳優侑燕至教子尋親事乃大慟曰  
吾父何在卽治裝至陝西脩歷艱險竟尋其父以歸人皆  
稱爲眞孝廉聞志

四明談助卷五

西塘河以北之山川古蹟事物詩歌自五嶺起至城西孫氏止已錄于前茲更錄新河以東經清涼山篠牆由西郭至北郭者于後

新河

宋制使丞相吳潛所鑿南引西塘河水自新河橋入環海會寺而東出西塘橋合西濠河之流北至保豐磬而注之江灌田數千頃聞志按新河既爲吳公所鑿則知前此西塘河與外河不通或雖通而河口甚淺其水兩分一由西塘河入郡城一由西濠河入郡城脉脊過河突起清涼山爲府城脉之護沙

四明談助

卷五

一

會別亭

在城西又有來青亭泰定五年縣尹阮申之改建聞志

王荆公會別亭詩

荆公嘗爲鄞縣令昔見一士人收公親札詩文一卷內有兩篇今世所刊文集無之其一馬上云三月楊花迷眼白四月柳條空老碧年光如水盡東流風物看看又到秋人世百年能幾許何須戚戚長辛苦富貴功名自有時簞瓢菜茹亦山雌其二書會別亭云西城路居人送客西歸處年年却問去何時今日扁舟從此去春風吹花落高枝飛來飛去不自知路上行人亦如此應有重來此處時能漫改錄齋

附寓公詩詞二首

蘇子美重過句章郡詩

宋詩鈔傳云蘇舜欽字子美梓州銅山人直集賢院耆之子也嘗再至甬上滄浪集中有重過句章郡詩

曾隨使旆此東歸日日登臨到落暉疇昔待行猶總角如今重過合沾衣窺魚翡翠忘形坐趁伴蜻蜓照影飛風物依然皆自得歲華飄忽賞心違

劉改之四明贈妓詞

鄱陽張世南游宦紀聞云劉過字改之號龍洲能詩詞流落江湖嘗于友人張正子處見改之親筆詞一卷云壬子秋予求牒四明嘗賦賀新郎與一老娼至今天下與禁中皆歌之江西人來以爲鄧南秀詞非也

四明談助

卷五

二

老去相如倦向文君說似而今如何消遣衣袂京塵曾染處空有紅香尚軟料彼此魂銷腸斷一枕清涼眠客舍聽梧桐疎雨秋風戰燈暈冷記重見樓低不放珠簾捲晚妝殘翠蛾狼籍淚痕留臉人道愁來須殢酒無奈愁多酒淺但託意焦桐紈扇莫鼓琵琶江上曲怕荻花楓葉俱淒怨雲萬疊寸心遠

又高麗使答和詩序

宋王闢之澠水燕談云元豐中高麗使樸寅亮至明州象山尉張中以詩送之寅亮答詩序有花面艷吹愧隣婦青唇之動桑間陋曲續郢人白雪之音之語有司劾中小官不當外交夷狄奏上神宗顧左右青唇何事皆不能對乃問趙元老

元老奏不經之語不敢以聞神宗再諭之元老誦太平廣記云有睹鄰夫見婦吹火贈詩云吹火朱唇動添薪玉腕斜遙看烟裡面恰似霧中花其妻告夫曰君豈不能學耶夫曰君當吹火吾亦效之夫乃爲詩云吹火青唇動添薪墨腕斜遙看烟裏面恰似鳩盤茶

### 駐節亭

舊有三處一在南門外一在東門外一在西門外在西門外者扁曰坐閱潮生在西門外者名曰來觀亭後樓曰皆山樓其先濱河有迎恩樓郡人屠浦爲記聞志今東南二處皆圮

### 清涼山 隱仙嶺

山在城西海會寺後嶺在寺前蓋天城土阜也志

### 四明談助 卷五

三

### 海會禪寺

城西三里元延祐六年僧妙壽建名海會菴學士袁桷爲記至正三年改名海會寺洪武間重建千佛殿復建舍利浮圖并塔殿永樂六年復建法堂敬止錄 國朝嘉慶間僧印峯重建後殿

### 袁清容海會菴記畧

出城西門皆良田白水高下綠樹蒼然雞犬相聞農家善于其業者也予由京師歸艤舟驛亭望之則朱薨碧瓦傑然爲人天居佛之道以枯槁堅忍爲能事卉衣糲食樹下冢間不求其豐足故從者樂善如歸二千餘年來爲之說者以莊嚴爲善果愚者益信狂者益怖而梵宮寶剎合郡縣山水之勝

悉爲所據有不可勝言者四明海之東絕處爲補陀巖大士顯焉鄧之東爲育王山釋迦舍利塔焉遵陸而南爲岳林爲天台皆遊歷之所而補陀育王自天子至于王公百司乘驛奉香幣不絕于道四方之民終歲膜拜至于西門始求渡海之路然而觸風濤烟霧率莫悉處所又舟人伺危殆時有不利而求者益不止豈非其教足以傾動而爲善有以復其良心耶有僧曰妙壽以其建菴之始未來告曰茲菴之創專以奉補陀育王岳林天台之遊者也初不過地千步屋三楹有同志僧妙然日習宗尚善勸募傾捨駢集又有僧元安清持行業信者俱至由是拓地爲畝十五屋百楹迎賓習靜各有其地獨不設方丈懼後人之佚樂以自恣也其說若是願請

四明談助

卷五

四

記以求永久予曰博施濟衆聖人猶以爲難浮屠氏日丐假于外而皆足以慰其志意蓋其說汪洋浩溥參之以報應而爲惡者懼若今有司興繕則民不勝怨咨海會之成相胥以勸何其易也妙壽深湛善思惓惓於後者厥慮若是雖欲勿永久其得勿永久乎泰定二年乙丑四月癸未記

明萬歷間每春二月來普陀者日不下數百謂之朝海城中袁氏設鋪于西門外以接其衆人至如歸名曰香埠獲利甚夥城西范氏以宅近其地起與之爭亦設一埠以分之而海會遂過而莫問矣自甲申後海禁立而絕響聞外人之至者先設願或朝三年朝五年有十年者蓋與朝楚之武當者等

敬止錄

僧中峯和梅花詩

本惠號中峯李氏子出家于天目山至元間至寧之海會庵說法至治三年募緣改菴爲寺與攸州馮海粟善馮作梅花詩一百二十首欲以示惠惠先置一火爐于方丈馮授詩惠不展嗅而焚之馮有慍色惠援筆而揮原詩和詩各八十首馮問餘四十首何不錄不和惠曰此令愛作故不和馮大驚

曹志本  
駭舊志

海粟名子振攸州人元集賢待制

聞志云明本號中峯錢塘孫氏子神儀挺異至治間至海會寺開法有梅花百詠學士袁桷詩云新河隄畔梵王家月色娟娟映白沙聞道官清徭役簡道人終日詠梅花名姓事蹟與舊志互異且云舊志所言和梅花詩乃俗傳也

四明談助

卷五

五

又李杲堂甬上高僧傳言其住海會寺甚久今寺中猶藏趙文敏所寫中峯像一幅稱其詩與夢觀蒲菴雪嶠爲甬上名僧四大家亦不及梅花百咏今所刊梅花七律畧見元詩選雖名人和者甚多但十一真疊韻到底務在足成百首誇多鬥靡粘而不脫當是好事者爲之

雪山道人寓海會寺

周道人維祚一名上竹字雪山揚州人諸生其才放浪累試不遇又丁喪亂遂逃之禪與浮屠冰懷者遊辛卯甬之西臯海會寺重修成延冰懷至雪山偕之來時西臯毛監軍象來有詩社同人吳于蕃管聖一倪端木汪伯徵皆振奇之士雪山遊其間大喜遂入社曰此間樂不思蜀也晚年歸卒于海

陵著有石爛吟續者舊傳

烏樓陳氏

甬上族望表又陳氏不知所自從亡光祿寺卿士京一望  
僉事陳公大章

字祖堯號夔石嘉靖壬戌進士歷官刑部郎中出僉閩臬  
事有富商先夕囑舟子艤舟待五鼓負橐登舟舟子殺之  
而取其橐中金故叩門呼媪曰郎君豈戲予耶何約舟而  
不來也其家倉皇無覓訟于官而不決公閱案牘詰舟子  
曰汝不呼其夫而呼其婦心知夫死耳囚乃伏辜其明決  
多類此著有餘清集宦成稿世德堂集三補者舊傳

陳山人大魯

四明談助

卷五

六

字穎叔號農山初余君房沈肩吾箕仲長孺諸公有甬上  
七子之目穎叔其一也穎叔精于史學嘗上取羲皇迄于  
元論斷其事盡爲有韻之文名曰史詩于此亦足徵其詩

學矣者舊傳

陳文學陟

字公步一字海岱大魯之從子也長于論史其謂樂毅之  
失在竟欲并齊之七十二城而有之故卒致卽墨莒之固  
守三年不下惠王之立毅亦幸讒之得行遂釋重負以去  
耳論荀彧爲東坡之所許則太過竟斥爲奸則太誣彧不  
貪爲鄴下之元勳而甘于一死蓋其心有不安者其前此  
見之不早耳皆讀史者所當知也詳續者舊傳

陳光祿士繡

字伯綸少時從祖穎叔絕愛之嘗曰是兒吾家鳳雛及長傳其家學益有名與曹能始先生論詩其集見石倉選中

官光祿寺署丞

者舊傳

光祿寺卿陳公士京

字齊莫一字佛莊其先世本奉化之朱氏明初遷鄞改姓陳觀察大章其宗老之顯者也西臯陳氏三十六族難以識別故公家稱爲烏樓陳氏公少有四方之志以天下多故遂挾策浪遊湖海公在閩時會熊公汝霖以魯王至鄭成功修頒詔之隙不肯奉王公說成功當以公義爲重成功始修寓公之敬其時會稽舊臣能籠絡成功而用之者

四明談助

卷五

七

惟張蒼水與公二人樓船得以南向無內顧之患戊子王遷公光祿寺卿會魯王上表粵中沈吟良久曰無以易公者成功亦欲啓事于粵公遂行粵人欲留之公不可己丑歸閩中魯王入浙留公在閩與成功相結以爲後圖久之見海師無功粵事亦日壞乃樂鹿石山房于鼓浪嶼引泉種花感物賦詩以自消遣別署海年漁長營生壙于中題曰逋庵之墓年六十五卒魯王在南澳聞訃親爲文祭之公少喜賦詩華亭徐都御史孚遠海上幾社公豫焉所著有喟寓一卷卮言一卷海年集一卷公葬後子式登守墓

三年挈家以歸

詳結埼亭集

附陳光祿雜作詩四首

山林別自饒天地樵牧何須變姓名但使白雲無我妬饑  
寒堅處保吾生 野水平橋春漲雨人家高徙夜巢寒天  
荒萬里無分野海闊諸峯失界疆 老去據鞍猶壯士年  
來束閣避書生大鵬長嘯思千里無那春風不送行 浮  
沈漫度乾坤厄成敗何殊潮汐過俯首十年前後事一回  
搔首一長歌

句餘土音擬薤露詞

山邱并吾志

陳光祿營壙

滇池雲漸昏牂江潮不至荒雞空自鳴莫了平生事茫茫  
鼓浪嶼以息逋臣翅休夸心尚長久無夢可恃首山者豹  
首邱狐何故山邱非吾志蒼涼有誰知聊復揮毫纂生誌

四明談助

卷五

八

詩話光祿飄零海外自營生壙于豈浪嶼中吾鄉人惟  
左丈紀雲嘗爲立傳其實蔡子英不是過也

陳都司肇域

字甸綏一字草亭按察副使大章孫也以武學諸生爲金  
塘百戶乙酉王總兵之仁奇其才擢爲都司墾金塘田以  
貢軍時年二十有八浙東旣下賃一廛于市賣古書畫曰  
迎碧樓其轉徙樓名也陳氏詩派自山人大魯始繼之爲  
海岱居士陟丙戌而後光祿士京從亡豫于海上幾社之  
列鴻臚士繡辭東江光祿少卿之命著書極多峩雪道人  
幼仔者最爲查職方伊璜所賞而草亭卽峩雪之徒峨雪  
之集不可得而草亭詩集尚無恙因歎草亭以年少布衣

能守故侯賣瓜之操其人足傳其詩亦不可沒矣續者舊傳

峩雪道人陳弼肩

字幼仔一字古愚諸生鴻臚士繡之族弟光祿士京之族兄也時有西臯三陳之目鴻臚辭列卿之命于丙戌見幾遠引光祿從亡海上而古愚殘山剩水之痛亦時見之詩晚年目翳所著有奚囊集續者舊傳

烏樓在清涼山之東篠牆之西與椅子漕毛氏貼近其遺蹟已爲菜圃惟萍沼一方石欄兩角尙存烏樓子孫猶能說其處

陳明經赤衷

字葵獻號環村明初自奉川徙鄞世爲儒家明光祿十京

四明談助 卷五

九

族子也公在諸生中挺然特立自以學問之道非場屋可究竟乃入天井山與名僧參考儒釋同異歸而求之六經近理亂眞之說始不足以惑之康熙初集里中同志執贄于餘姚黃梨洲倡爲講經會搜故家經學之書討論得失發先儒所未發十年間五經次第畢講公以貢入京 廷試崑山徐健菴尙書一見投契以碩學待之由是公卿爭欲延致公作貞女篇却之竟窮老卒于京師當講會初立郡中所未經見舌舉口張公輒揎拳欲毆其人惶恐速去不敢同盤而食其自信之力可謂惡言不入者矣故甬上語經者必首推焉

續者舊傳  
參曹志

陳太母教子

陳子葵獻門庭孝友爲梨洲先生高弟授蕺山人譜紹其絕學足任吾道之重已而知葵獻所以致此盡由其太夫人教之也蓋葵獻少有盛名家在郭西復當舟車所會處自梨洲先生至甬上必主葵獻家同門諸弟子畢集至所往來他客率當世名士太夫人常以葵獻得事人師與賢者交遊爲喜每客至必親辦中厨出豐腆陳帷帳供具諸君登堂見母太夫人俱能次其高下退爲葵獻言使相資益一時師友淵源遂盡聚其門然則太夫人春秋高卽葵獻之學日進是惟太夫人爲能善引之也葵獻有弟曰和仲子曰子政俱能傳葵獻之學恂恂孝謹不愧爲佳子弟

杲堂文  
鈔壽序

四明談助

卷五

十

陳檢討鴻績

字子遜博涉經史順治丁酉魁于鄉授雕寧令康熙己未同里黃御史斐舉爲博學鴻儒應試中選授翰林檢討著紺溪本論紺溪偶錄纂性理語錄三蘓寤書明詩論定

詳曹志

陳山人本衷

字行六一字庭梧翰林鴻績之羣從也

續者舊傳

嘗居光溪有

光溪春日和李杲堂散懷詩又嘗爲客三山居劍津有答裕公姪問閩程詩俱見集中

陳氏同族

賦正德癸酉舉人知縣

允揆天啓辛酉舉人

鄞獻表

祥鳳康熙丁酉歲貢

雲鳳雍正癸卯拔貢

翽

鳳雍正丙午舉人 昌乾隆甲戌進士祠額選舉表同

參知政事王次翁墓

在清涼山麓 次翁字慶曾號兩河先世家濟南崇寧癸未進士歷官資政殿學士奉祠引年謝參知政事除資政來居于鄆卒被旨護葬于此山長子侍御伯庠次子宗正丞伯序墓亦在右石坊二外一坊在寺嶺下康熙癸亥十二月終夜被盜毀聞志

萬季野竹枝詞

宋室宗人骨一坵游人唾罵幾時休恨無長劍開荒塚截取枯骸獻岳侯遺恨金牌召岳軍致令南北遂平分若非王氏傳家錄誰識奸謀由此人

四明談助 卷五

十一

詩注次翁本濟南人從高宗南渡遂家于鄆官參知政事爲秦檜心腹撤三大帥兵召岳武穆皆其謀也詳見王氏傳家錄卽次翁自撰

篠牆

黃南山三江亭賦序劉宰之討孫恩來句章營于三江口後人稱其遺壘曰篠牆

西壽昌寺

城西篠牆之北宋淳祐間僧慧通因城中壽昌寺燬久而民居其址乃徙建于此以舊額揭焉元至正二十五年城中復就原基重建城西遺留此寺聞志

玉和堂李氏

李氏先世自青州來宋天禧時名鼎者仕慶元遂占籍于鄞居西城社壇橋北南宋有八葉進士後遷于奉復徙鄞至第十一代分居于籬牆衙口稱玉和堂李氏其遷奉祖侑建炎初集義勇拒金兵保守奉邑事載郡志

社南李氏宗譜

李節推燧升

字日生號心蓮幼警敏于經史一覽通貫尤長于歌詩順治乙未進士官福建漳州府推官著有心聲集

三補耆舊傳

後

以科場事株連充軍邊外

鄞獻表

李公子杜

字漢唐號逸叟先世宋天禧時名鼎者由山東青州以賢才舉仕慶元爲廸功郎遂占籍于鄞十九傳至名邦繪者

四明談助

卷五

十二

以貲雄里中君之祖也君父燧升順治乙未進士授福建漳州司理明年丁酉江南科場關節事敗世祖震怒棄內外簾官于市以公與知情籍其家屬發鐵嶺充軍時君年十五方在書塾忽緹騎到門倉皇出視遂與俱行初世祖撫有諸夏也山海關外爲罪人放流所朔風時起烽烟笳吹驚耳目君一家八口生長南服不耐寒苦乃相繼卒世遼有不葬其親者親死多懸骨樹杪見君具衾木薦粢盛咸太息慕效俗爲之移嘗奉將軍令入窮僻採人參見萬鴉回陣密林中恍惚有人音卽視之廼旅人絕糧不能起肌肉爲烏啄幾盡君救之得生冬十一月使朝鮮國鴨綠江冰凍君攬轡從冰上行冰滑馬不能進匍匐百餘

里冰雖厚千尺中流搏擊聲應如雷聞之股慄歸白將軍將軍惻然免君差操登華表山望家鄉不見撫膺大慟忽有告者曰我得鱣麋角差可入中國請借我文憑往詢其姓氏則昔密林中餓人于是函祖父骨就道過沙嶺犯虎豹驚死復蘓見函無故迺大喜入關潛至故里信宿而去將軍從口外覓君不得知爲餓人賣拷掠幾斃君忽返將軍服其誠益厚禮之遂頌繫任君遊君挾岐黃術北達女直毛憐西走朶顏福餘泰寧渡三岔河過遼陽舊城足迹半萬里存活人無算會 仁廟狩赦君歸年已四十四矣司理公兄弟五人公居長次皆從公被逮君兄弟三人君居長次紹中甫晬日而難作出爲人後君娶王氏奉天錦

四明談助

卷五

十三

州人子四天鐵嶺者三同歸者一曰爲碩君南還二十三年而卒先是君之外祖湯君平麓合葬函歸骨于殷浦廟之陽爲碩因祔阡焉承先志也

春草堂文約墓志

春草堂文約係鄉長者謝三台之孫爲雯所著爲雯之母逸叟之姊也故爲雯爲其舅逸叟作墓誌銘篇中有口外風景約畧可觀因脩錄之

李崇信麟經

字含嘉號鄧邨九歲喪父自幼工于爲文拙于謀生不得已辭母入都適有生員教習內府之例脩員六年而補陝西崇信令乞終養歸里官橐蕭然教學養親以終

李氏裔家傳

孫潤德道光元年舉人

潮音堂義井

在城西潮音堂前元里人陳罕置蓋亭三間以憇行汲者且購宋張卽之潮音堂故扁額於其上後圯其子辰易以石楹而新之又卽亭後隙地構樓如亭數明祭酒陳敬宗侍郎楊茂元爲之記曹志潮音堂後塘河於道光四年市井富家竟築土截斷舟從管家岸迂道而行試思當日陳道臺浚河本欲城中水利進出兩旺使血脉流通今將血脈堵塞成何理路是謂無知忘作

慈竹軒

方正學慈竹軒記昔年拜漢中之命歲暮至鄞循城行十里許逆旅舍已閉門遙望崇墉高棟有室翼然舟人指曰此張

四明談助

卷五

十四

君敬輝之所居也張君素善養母好客喜事使人先焉敬輝出迎客張燈具肴羞酒數行諸弟侍側皆整飭不凡敬輝因爲予言少喪父賴母氏以克至今正堂北種竹數十百箇滋植茂甚母悅之因名侍膳之所曰慈竹軒遜志齋集

馬孝子客作

馬扁嘉靖間西城外傭也賃工養母值時物初出不計直必市以進力不能常得鮮日爲人執役夜則漁以供饌母遘疾無以具醫藥則中夜籲天斷一小指煮湯飲母母遂愈人稱

爲馬孝子

李志

裘義士鰥居

裘望亭失其名萬歷間人兄憶亭諸生娶陳氏生四子而沒

長者僅十二歲餘皆穉弱陳氏之兄利其聘財勸妹改適望  
亭持不可是時望亭赤貧陳氏兄知其不能贍也集親隣共  
議謂望亭曰爾欲嫂守節固宜然家無一壠植嫂姪並餓死  
爾兄且無後不若挈諸孤適他氏猶可延一綫望亭泣曰吾  
今雖力不能養然日抱諸孤行乞以所餘供嫂亦足以活汝  
視嫂果餓更議此未晚衆皆是望亭言或有聞而義之者貸  
以貲設米肆西關外夜則舂作日操升斗糶米以其入之贏  
給孤寡久而業稍裕或勸其婚娶則曰吾一有室家必不克  
分顧兒子卽吾子也遂鰥居終其身然避嫌薪米皆命姪就  
肆中負歸未嘗一返故廬其後諸姪皆成立望亭尙居肆中  
至得疾環跪泣請乃歸歸浹旬而沒

蔣樗  
菴集

四明談助

卷五

十五

西衙堂陳氏

大卿橋北過東有務本堂陳氏宗祠族分東西二支稱東衙  
堂西衙堂據其宗人云漢元方公紀之後裔鑣仕元至正間  
爲廣西叅政致仕自定海金塘徙居勤城西門外說似無稽  
今錄其祠中懸額于左

鴻臚寺少卿陳應逵 太僕寺正卿陳大經 工部郎中陳

國棟 鄖縣知縣陳沂 無錫縣知縣陳國鼎

以上郡邑志皆不載選舉表鄞獻表亦無考惟陳保乾隆  
戊午武舉陳海乾隆乙酉歲貢列于選舉表與祠額同

城西范氏

甬上族望表城西范氏宋丞相宗尹之後也兵部侍郎欽一

望 范氏自僕射宗尹扈駕南渡居四明參政以下諸第聚于一方惟司馬公欽別建第于西城預脩倉右其列傳載於新第下

### 叅政范公鈞

字宣卿號印山博通經傳中萬歷乙未進士授刑部主事出爲四川叅政後致仕歸卒年七十二詳耆舊傳弟鉅字大卿以恩貢爲常熟教諭 鎬字武卿嘉靖丁酉舉人爲寧國令有政聲聞志

### 范舍人汝植

字木公少叅鈞孫也由上舍官中書丙戌後隱居舍人有雄才賈志以沒與高都御史爲郎舅倡和最多都御史極

## 四明談助

### 卷五

十六

稱之舍人垂老尚健游同里錢孝子美恭萬里尋親依舍人得至粵云續耆舊傳

### 鴻臚范公大澈

字子宣性孝友善讀書少司馬東明公欽其仲父也以太學生再試不第補鴻臚寺序班其時國家方盛使節所臨極海內外子宣凡七奉璽書進秩二品所過名山大川留覽題咏傳于一時性酷嗜鈔書與里中賢士大夫品書題畫垂二十年卒年八十七初司馬公歸里于宅中起天一閣藏書極浙東之盛子宣數從借觀司馬不時應子宣拂然益徧搜海內異書秘本不惜重價購之充其家凡得一種知爲天一閣所未有輒具酒茗佳設迎司馬至其家以

所得書置几上司馬取閱之默然而去其嗜奇相尙若此

詳者  
舊傳

### 范文學大捷

字子謙諸生世父德泉無子所立後者不才逐之而以子謙爲後旣而前所後者困甚乃請于繼父分給田宅以全昔恩其人旣沒產盡廢復迎寡嫂同居爲嫁其三女國難後取所作詩文盡焚之以布衣終其身續者  
舊傳自宋僕射至文學爲第十三傳

### 將樂丞范公大濩

字子尹號海東鴻臚寺大澈之弟以上舍官山東布政司照磨陞將樂丞復攝令事生平殫孝極友鄰族多被其周

### 四明談助

#### 卷五

十七

恤詳聞  
志

### 知南漳府范公汝梓

字君材將樂縣丞大濩之子博學有文名以萬歷甲辰進士授工部主事歷遷南漳府知府公性嗜學所積四部與司馬鴻臚畧等里中士大夫藏書家必推范氏焉著有落迦山房集詳者  
舊傳孫廷鳳與兗州牧光遇之子廷魁同登順治乙未進士官知縣聞  
志

### 知兗州府范公光遇

字逢年少貧力學每五鼓起然燈讀書日則治生以養父順治五年舉于鄉次年成進士授膚施令歷遷知兗州府歸里子廷魁字介五與族兄廷鳳同登順治乙未進士選

庶吉士改檢討早卒

詳邱志

知南和縣范公煒

字赤霞爲人伉爽不喜有所附麗惟閉門讀史考據古今方畧爲有用之學康熙初以策論取士公仿古制科策溷溷千餘言遂于癸卯甲辰聯舉鄉會試除南和知縣諸政績見邑志著有七松齋集

家狀

知南雄府范公光曦

字晨馭南和煒之從弟以拔貢生授陝西麟遊知縣歷陞知南雄府嘗書座右曰吾仕官五十餘年只肯喫虧三字盡之與兄煒操尚不同並以吏治稱

詳家狀

知延平府范公光陽

四明談助

卷五

十八

字國雯文學大捷之孫學者稱爲筆山先生康熙二十七年舉會試第一授庶吉士歷兵部郎中踰年出知延平府嘗大書廳事曰淡泊明志平易近民郡人以爲實錄感疾乞休歸著有雙雲堂詩文集

詳續者舊傳

子廷諤字質夫納粟得福建泰寧令泰寧有書網巾先生墓故義士謝韓所葬也地窪濕爲改葬城東且立碣焉著有充安堂詩稿杉溪雜咏延平之次子之恒初名廷彧字稼軒與鄭義門善常以詩往還

續者舊傳

布政范公廷元

字掄三與叔光遇同登順治己丑進士與從弟廷魁同選庶吉士改檢討嘗侍班南海子廷魁班居後唱名世祖

顧廷元曰汝弟耶廷元叩頭謝因賜衣二襲廷魁早卒  
廷元歷遷至洗馬晉廣東右布政使最敦內行事叔如父  
所置田宅與從弟共之增先世祀產周三黨之貧者邱志  
知商河縣范公從律

字希聲會元光陽之孫泰寧令廷諤之子雍正癸丑進士  
選入庶常散館以知縣用得山東商河縣值歲饑親稽戶  
口以給賑邑有奸民崔如蘭等結十虎社以刀筆毒善良  
有劉子純者爲盜窩主皆置之法訟牒稍稀盜亦衰止乃  
立義塾召邑士親課之于署中置書屋三間有以文就質  
者卽延入與縱談旁縣士聞之亦競集會以病告休致既  
歸菲衣藿食日與里中後輩論文賦詩以自適年七十餘

四明談助

卷五

十九

卒著有繭屋詩文集黃崑圃集子永潤號洗竹以廩貢捐授會  
稽訓導永澄號半邨乾隆丙戌進士先用嘉興府教授歷  
任山西石樓徐溝知縣終朔州知州孫震薇字紫垣嘉慶  
庚申歲貢曾孫上組字執如嘉慶庚午順天舉人

采菊老人范從徹

字獻才翰林從律之弟由國學捐授壽春知縣陞無爲州  
知州爲人脫畧行迹以罣誤解任歸里素與李滙川蔣娥  
野諸人最投契晚年出必與偕互相唱酬自號采菊老人  
喜作字饒有天趣其對句不事思索援筆立就錢竹初令  
鄞嘗設燕小林棲賞菊以秋菊有佳色五字分韻賦詩錢  
公贊采菊詩酷似樂天能令老嫗亦解意蓋嘲采菊也采

菊次日卽以能令老嫗亦解六字爲韻詩以復之其風韻如是年及九十卒有采菊山人集紅雨集一葦集

范氏同族 敬生 崗順治辛卯同榜舉人 光燮康熙丙

辰恩貢 從夔康熙己卯舉人 從俊康熙庚子副貢

向道雍正甲午舉人 永齡雍正丙午舉人 永恆丙午

同榜副貢 從龍雍正己酉歲貢 永譽乾隆丙辰舉人

從諫乾隆庚午歲貢 永祺字逢吉號峩亭乾隆丙午舉

入 懋裕字式昆號耐軒嘉慶甲子舉人仁和教諭 上

縑懋裕子嘉慶戊寅 恩科舉人

城西唱和諸子

潘國博訪岳字師汝少補郡庠生風流俊逸工書法精繪

四明談助

卷五

二十

畫詩文尤秀雅乙酉以薦授國子監學錄丙戌後放浪山

水間賣畫傭書自給雅善手談終日以坐隱年八十餘兩

目尙炯炯精小楷與二三耆老飲酒賦詩嘯歌不輟眞逸

民高士也

續耆舊傳

吳隱君岳生字于蕃

傳失

管隱君道復字聖一又字蓬廬

傳失

汪隱君應詔字伯徵能書能草篆隸諸體能奕能琴又能

詩詳見毛象來傳後

毛隱君雷龍字二爲

見前半村毛氏本傳

袁忠臣故居

西城外宋咸淳進士袁鏞之居

聞志

袁氏代有顯人趙宋渡

江子誠自南昌扈駕爲臨安知府遂居鄞子孫四世皆大官見戴九靈袁氏譜序而黃南雷撰袁提學墓志又謂其先汝南人自宋咸平進士祺徙明州未知何據

甬上前族望表城西袁氏知臨安府子誠之後也德祐忠臣一望菊莊二望其子孫見後表卽柳莊也

袁忠臣鏞

字天與治春秋有文武才尚氣節中咸淳七年進士第以父憂未卽仕時宋事日蹙與宗室趙孟傳將作少監謝昌元平日友善因相結納誓以死殉國德祐二年元兵至鄞

四明談助

卷五

二十一

遣游騎十八人候于西山資教寺公先往說趙謝二人許以兵繼之北兵聞公之說疑信未決明日大軍四集趙謝懼乃密以兵獻于車厰公失援遂遇害時值清明祭墓公家人舟次鼈山聞公死三子二婦三孫二孫女兄子衡之妻胡與其子婦二孫并姑之子及妾婢合十七人悉驚悼赴水以死惟仲子澤民甫六歲亦在溺中以僕救得免詳見鼈山條下

鄧山袁先生士元

字彥章德祐忠臣鏞之孫也性至孝父澤民嘗患背疽先生吮之立愈少嗜學講誦至廢寢食旣長益沈博以御史薦授本縣學教諭謂鄧山書院長危素薦爲翰林國史院

檢閱官力引年不赴晚年築城西別墅種菊數百本自號菊村學者著書林外集七卷

耆舊傳

柳莊

城西袁氏之居有聖旨亭

聞志

戴九靈四明袁氏譜序

異時文獻之盛稱東州東州文獻鄞爲盛而袁氏又鄞之最盛者也袁氏之居鄞者三族曰西門袁氏曰南袁氏曰鑒橋袁氏鑒橋袁氏有蒙齋絜齋二先生以風節行誼爲時所敬仰南袁氏有清容先生諡文清者以奧學雄文爲世所宗師而西門袁氏則有名鏞字天與者以忠貞節義著聞于時鄉人士至今口之不置鏞之四世孫珙與予善示予以先世譜

四明談助

卷五

圖予受而觀之爲之歎息不已蓋袁氏代有顯人趙宋渡江曰子誠者自南昌扈駕爲臨安知府遂居鄞子孫四世皆大官至鏞以進士死國難而族稍微自是而後獨以儒世其家恂恂自檢束鏞之子衍無子而子其弟澤民澤民之子寧老以爲弟繼兄後于禮非宜乃白諸有司奉澤民歸本宗而已爲衍子倫序復正識者躉之寧老博記善文從之學者稱之曰菊村先生珙蓋其冢嗣也讀父之書早以才名爲諸公所器重今又佩服父訓取其所次譜牒圖而衍之深得一本合族之道此予所以觀其書而歎息也

太常寺丞袁公珙

字廷玉菊村之子好學能詩精相術洪武中姚廣孝薦于

燕王召至北平王擇衛士類已者九人操弓矢聚飲肆中公一見卽前跪曰殿下何輕身至此王起去召公至宮中諦視曰龍行虎步日角插天太平天子也年四十鬚過臍卽登大寶矣王慮語洩遣之還及卽位召拜太常寺丞公爲人孝友端厚待族黨有恩所居鄞城西繞舍種柳自號柳莊居士著柳莊集嘉靖志

時京師以金忠卜袁珙相呂紀畫范洪奕爲四絕傳並附後

金忠襄忠 見韓嶺金氏本傳

袁太常珙 傳見上

呂待詔紀字廷振號樂愚工翎毛山水花果走獸初法馬

四明談助

卷五

二十三

達馬遠設色精妙久而不變高處直入黃荃逵遠之室翎毛至此集大成矣宏治初徵至京師授錦衣指揮待詔武英殿武宗居東宮時孝宗謂曰此老之畫妙奪化機如英明聽諫萬年清潔等圖煞關治體工執藝事以諫呂紀有焉從子高字崇岳號松石翁棠字德芳號竹村翎毛花石皆得家傳聞志

范全癡洪字元博世居城南生而穎異賦性清介幼習舉子業數奇不偶遂有高世之志奕棋以自娛及游京師時李公東陽楊公一清喬公宇當朝每延致對局脩極歡洽而全癡絕無脂韋之念故禮遇益重其與人奕隨其人之高下不求大勝然終不少挫國手之名于是乎著聞志嘉慶

初有陳起鳳者亦居城南以善奕名

柳莊相術受于吳國才

國才姓吳世居奉化之白巖村其稱國才或云自謁文皇大見賞異稱曰國才世卽以國才名之若官位然國才幼貧子不事生業家去雪竇二十里與其僧善數爲周饋歲除國才歸共妻卒歲僧命沙彌具一切需餉其家沙彌忘之入暮始憶及以一人負擔一燃炬及昏度嶺失跌傾其半先是妻云積日從隣貸歲朝當何嚮國才引鏡自照云無憂行至矣抵暮不至再理鏡則云已減半恒自樂其樂慰其妻絕不以相術售先亦不知其術從何受而意常欲授人無所遇久之入郡得一人卽奉常袁公也大奇之授

四明談助

卷五

二十四

以術公有子忠徹方在髫又奇之咨嗟自喜曰吾道乃在此若父子必當英主恩寵第顧勿洩有我爲我累矚之再三比珙已被遇文皇問術神如此豈無所授乎珙不敢隱以吳某對卽遣安車徵之至則召入內與語大說擬授官如珙國才百叩辭得放還山已得命急取鏡視曰惜遲一日不得正首邱果至西壩卒于舟去其家一日程云按他編多不載余故爲傳以見人生有命世之逐嗜而不已猶謂吾所有不止此以蒙非分喪故吾何可勝道哉

啜墨亭集

曹孝廉譏柳莊

寧波曹孝廉某作詩譏相士袁柳莊曰英雄老眼識英雄我正懷疑欲問公九尺曹交湯九尺重瞳項羽舜重瞳形

容何乃一相似功業如何兩不同須向此中明造化莫將  
容易問窮通

### 袁給事珪

字廷圭菊村次子少善讀書工詞翰永樂改元官禮科給  
事中有敢言聲出判和州以秩滿致仕自號清白生所著

清白集耆舊傳

### 袁尙寶忠徹

字靜思柳莊之子幼傳父術從父謁燕王王宴北平諸文  
武使公相之所言禍福皆奇驗及王爲帝召授尙寶司丞  
秩滿進少卿歷事三朝數進讜言正統中致仕卒著符臺  
外集鳳池吟稿耆舊傳子應驤治尙書嘗以父所纂人象

## 四明談助

### 卷五

二十五

大成進授鴻臚寺序班成化志

### 承德堂產芝

太常柳莊先生之子忠徹官尙寶少卿宜人邊氏相夫以  
禮事舅姑以孝睦族御下皆克盡道尙寶遠仕京師宜人  
營室于舊第而堂楹產芝厥子應麟狀其詳進書椿庭凡  
在京名公卿歌詠之而祭酒胡公儼記其事彙成帙仲  
子鴻臚應驤鏤板以傳題曰瑞芝詩集皆著明太常尙寶  
身修家齊之效也故名其堂曰承德黃南山瑞芝詩序

### 袁尙寶以相諫

永樂八年帝北巡太子監國爲讒言所中不爲上所悅榜  
午門凡東宮所處分事悉不行太子憂甚袁忠徹謁東宮

見驚氣滿面謂內侍田嘉禾李謙曰殿下驚氣怕人父子天性切須調護二人以聞成祖坐右順門內召忠徹至問之曰東宮氣色既惡可同蹇義金忠再往視之回奏曰面似青藍驚憂之氣也願皇上寬之收部午門外榜庠幾可解成祖從之東宮召金忠等諭曰今日之事皆袁忠徹力也

識小  
編

尚寶諫成廟服符藥致疾

永樂十六年四月禮部郎中周訥自閩還言閩人祀南唐徐知諤知誨其神最靈帝命以二仙神像至建靈濟宮以祀之上每有疾用符紙及藥劑以進詭言二仙所書也上服久之發噦失聲一日袁忠徹與御醫陳敏等侍奏曰此

四明談助

卷五

二十六

爲痰火虛逆之症蓋靈濟宮符藥所致也太醫官以保和聖躬爲事何不用藥治之上大怒曰仙藥不服服凡藥耶忠徹叩頭慟哭後宮聞之皆哭上怒曰忠徹哭我遂死我耶忠徹趨出待罪久之始解至二十二年上北伐駐蹕沙河前疾復作忠徹復以爲言且勸上回鑾不聽遂有榆木

川之變

識小  
編

袁忠徹家世編一卷多名公贈言在王弇州家見太平清

話錄

敬止

袁尚寶居家時支家一童子韶秀且機警尚寶謂不利于主使遣之支雖素神其術意不忍不得已而聽之童既去無所歸一夕宿古廟中見牆角一破衲裹金欲取之因歎

曰我以命薄被主遣今掩有此物天益不容矣宜守以待失主至且留廟中不去旋見一婦人掩涕入四顧旁皇問之乃軍人妻以夫坐事應死賣產及稱貸得此以獻某指揮求活因入廟少憩遺之童詢其物皆合卽舉以還婦婦之夫因得釋指揮頗聞之令人訪致育于家年老無子以其秀慧遂子之未幾致仕遂襲職因拜故主告之主歎曰袁君之術疎矣邀尚寶至仍服故服捧茶至尚寶見之驚起曰此故某人耶何以至此謬曰因彼無歸復留之尙寶笑曰君毋戲我今非君僕三品武階也形神頓異當有善事以致此支始歎服

陸庚粲  
已編

全謝山跋袁尙寶行狀

四明談助

卷五

二十七

尚寶袁公行狀黃先生南山所纂也尚寶傳其父之學世以爲術士耳不知其因成祖養賢之間而詳及前代學宮書院之制論武臣居喪之當解職謂皇太孫獲鹿當先獻皆讜論也而力爭靈濟宮符藥之妖妄尤大臣風節惜南山先生之狀其叙事過于質直無文

袁禮部孟悌

字本仁號葺齋清白生曾孫成化丁未進士授禮部主事爲人亢直不能與世浮沉因早引年歸里爲詩與堇山李先生齊名有葺齋集

耆舊  
傳

袁行人文顯

字德章正德甲戌進士拜行人司行人幼穎異長益奇偉

有大畧工文章著闡然遺稿

西袁氏家秉

袁通判祖義

字質甫嘉靖戊午舉人知南康縣陞通判被議去居官剛正不取一文其卒也無以爲殮屠禮部隆爲賦廉吏詩

西

袁氏家乘

從弟祖榮嘉靖癸丑進士官知縣

聞志

袁主事時選

字無擇萬歷乙未進士官南京刑部主事少有才工詩屠長卿先生一見賞之普曰吾身後後文章之事當屬無擇及

長卿沒無擇爲詩哭之極哀

耆舊傳

參將袁節愍公斌

公崇禎朝仕至江西參將值奉新土寇起奉檄往勦兵敗

四明談助

卷五

二十八

力戰死之乾隆四十一年賜諡節愍

錢志

袁提學時中

字向若號來庵幼失怙恃依其叔父寄食市廛勵志問學然貧苦特甚五棺具在淺土陳侍御朝輔見而憫之助以貲乃克葬著報恩編以識康熙六年登進士第吳三桂反從親王南征加禮部主事屯兵楚中澤國暑濕士卒多疫死公通曉醫術爲之處方製藥雖斲養卒亦必躬親診視軍中無不感泣以故疫不爲害一日赴王急召山程積雪劣容馬足忽墮峭壁下垂梯出之已折脅死矣適遇蒙古醫人始不死蓋公以感動軍心得此非天幸也隨征七年始班師後爲貴州提學僉事行部甫畢感瘴疾遂不起

南雷

定文

鄉長者袁公鰲

字士占幼嗜學既長益刻意讀書連曉夕不輟家有老屋在郭外野田四接每隣雞唱田夫雜作往往識公燈影來就乞火相與勞苦而罷日以爲常公讀書務求心得于六經秦漢之書無不究極而尤勤于易其與子弟講說不待開卷終始條理爛如也居常沈默出與牧童販豎遇亦莫敢有色侮意思寬然曰不報無道吾則能之于是鄉之人尤稱公長者後以子貴贈刑部郎中

行狀

知永北府袁公德達

字信吾乾隆七年進士試刑部主事尚書張照才之在刑

四明談助

卷五

二十九

部能會通律意剔抉疑互吏不能欺出知雲南永北府地在金沙江外民獠雜處貧瘠頑悍公爲之疏渠墾荒興學勸士俗以丕變有大吏索金不應遣人假他事至郡陰刺其過無所得還自治狀大吏慚服行薦之會丁內艱歸後服闋就銓卒于京師貧無以殮同年生相與經紀而歸其喪西袁氏家乘子鈞字秉國又字陶軒嘉慶初以鄞學生舉孝廉方正留心甬上掌故著鄞北竹枝詞有陶軒詩文集選甬上列朝詩餘人各有小傳芟羅極廣今二子俱亡親知家當善爲傳布

阮芸臺定香亭筆談鄞縣袁陶軒

鈞

工詩能古文專治鄭

康成一家之學于甬東耆舊詩文事蹟尤多掌錄故余錄

兩浙詩于甬東最詳

袁氏同族 懋芳崇禎元年辟薦知縣 宗舜順治十三年歲貢 宏益康熙二十三年舉人嘉定知縣 德峻字眉少康熙五十力年舉人工時藝能詩有虎林雜咏 德高雍正元年拔貢 維熊乾隆六年舉人淳安教諭 萬傑乾隆三十三年歲貢

柳莊花紅

花紅一名林檎一名來禽見王右軍帖

嘉靖志

袁太常柳莊家

善植此果

勾餘土音注

西袁氏先世逸事

袁陶軒鈞鄧北雜詩

四明談助

卷五

三十

宗丞舊第已成塵瞻袞當年唱和頻白髮青衫名不墜兒孫幾輩作詩人

先宗正公子誠從宋高宗南渡始居鄞其第在新塘河北魏文節杞送袁朝奉芳秩滿趨朝詩有白髮尚堪談世事青衫原不墜詩名之句見四明袁氏譜圖朝奉宗丞孫也瞻袞堂名見文節詩自注自朝奉以下代有詩集省元釋褐尚居廬抗節焚身史失書評事獨標忠定諡易名疑在衛王初

先忠定公鏞咸淳進士授簽書平江軍節度判官以母憂未上死德祐之難詳續忠義錄林評事時躍袞史言進士祥興殉難最烈諡忠定誤德祐爲祥興又忠定之諡不知

見何書袞史乃傳寫之本竊意祥興二字當在諡忠定前耳忠定嘗中省元見譜圖簽判之勅尚存世亦無知進士已受官者

菊成村舍柳成莊蘊藉風流接野航賸有孤亭碑影在橋南  
橋北久荒涼

先教授公澤民號野航忠定之子檢閱公士元撰父行狀稱其風流蘊藉有故宋遺風見譜圖檢閱公嘗于別墅種菊數百本自號菊村學者稱菊村先生見九靈山房集太常公珙所居爲柳莊中有聖旨亭見嘉靖志及聞志檢閱公新塘書舍詩舍前舍後皆春水橋北橋南賣酒家見書林外稿禮部公孟悌步入柳莊故居詩孤亭只有穹碑在

四明談助

卷五

三十一

浩蕩天恩刻幾行見葺齋集

海外詩人舊姓樊吾家過訪幾開尊蓬山歸後無消息好把科名付子孫

象山樊天民寓吾邑與先檢閱倡和最多書林外稿有和天民欲歸象山諸篇象山志樊餘慶傳引先公詩而以天民爲餘慶字往嘗疑其年代懸殊必非一入比讀滎陽外史集乃知餘慶天民子也

四明別館聳雲霄其許貞心擬後凋到得滄桑遺一老交游三世已三朝

福順觀在西北隅天歷三年道士呂虛夷就觀建四明山  
仙官祠虞學士集題曰四明別館見至正續志將教授景

高稱先檢閱公與危太樸呂虛夷爲歲寒貞節見教授撰  
檢閱公墓志書林外稿壽呂瀛海詩我方而立足先倦公  
到者稀顏未蒼檢閱公以大德丙午生而呂長公四十歲  
其生乃在宋咸淳初給諫珪挽呂詩三代交游今日絕百  
年事業一朝亡蓋呂卒在元末明初百有餘歲也

僧寺鐘聲聞隔岸五更燈影出荒籬田夫趨曉常求火正是  
先生讀易時

先祖贈刑部公諱鰲讀書連曉夕不輟尤邃于易著周易  
講義王司業太岳撰行狀所謂老屋在郭外野田四接每  
鄰雞唱田夫雜作往往識其燈影來就乞火者也僧寺鐘  
聲隔岸聞檢閱公新塘書舍詩見林外稿

四明談助

卷五

三十二

堂柱芝生左右偏玉芝晚出色瑩然雲孫清白能承德又放  
重臺盆沼蓮

先尚寶公諱忠徹官京師宜人邊氏與子應麟作堂成左  
棟產紫芝家人以爲菌去之踰年右棟復產赤芝亦去之  
未幾玉芝一本特生右襟柱色微紅見胡祭洒儼承德堂  
記先子守永北歸盆植蓮花其二莖已謝房不作菂花復  
發于房一時多詠歌之

西臯管氏

管氏世居柳莊坊側惟光祿寺卿別治第于祝都橋卽屠天  
官故第後遭回祿亦有自西臯遷南湖者詩人管櫜也薛千  
仞鄴獻表又稱縣前管氏想其先自縣前遷于西臯

甬上族望表管氏明初有刑部郎思易未知□光祿之先世否光祿寺卿大勳聖修二望

### 管刑部思易

字原理永樂十三年進士授刑部主事持法平恕奉使湖廣辨釋疑獄全活甚衆衡陽少婦秦氏孀居姑欲嫁之不聽有鄰人馮小二將挑之以姑在不得間因計毒其姑有司遂坐婦以罪公至郡夢老婦繫二馬泣訴車前曰馬實殺我非婦也比至有司以獄上求馬姓者不得視隣右尺牘有馮小二曰得無是乎遽呼訊之卽立承婦遂得釋諸政績見嘉靖志

### 光祿寺卿管公大勳

## 四明談助

### 卷五

三十三

字世臣號慕雲嘉靖四十四年進士授庶吉士遷給事中論事多平反歷遷光祿寺鄉致仕有休休齋集六卷詳耆舊傳

### 知慶陽府管公學經

字明道號芝房光祿卿之從子萬歷戊子舉人歷官慶陽知府平西番盜賊以母老乞終養歸詳聞志

### 雪鴻山人管櫝

字無棘諸生在萬歷天啓間有盛名管氏由西臬遷南湖說詩自光祿大勳始至山人而大甬上社集無不預者計其資格不下汪伯機輩而不登杲堂前集遂致脫落後得閨麗咏于屠氏蓋屠運使漢陂譜閨麗三種曰雅麗韻麗幽麗山人按目賡和而以己意廣之同時沈太常泰藩輩

亦和之成集然以山人爲最後復得其悲遼東詩則又恍然韓學士之志節固不當以綺語貶價也續者舊傳

管氏同族 穀嘉靖四十三年舉人韶州府同知 大燿萬

歷二年進士主事 三輔順治十七年舉人 三覺康熙

八年進士 芝康熙二十三年歲貢 三珪康熙三十三

年歲貢選舉表

馬公橋董給事墓 馮侍郎京第王侍郎翌亦葬于是見續耆

舊傳

橋在保豐礮西董給事志寧隨魯王至舟山辛卯舟山失守公自刎死其時以鄞人同死者楊吏部思任戴工部仲謀也遺骸在海上陸公宇燝捐金募人致之以禮葬于城北馬公

四明談助 卷五

三十四

橋下先一日夢公曰吾刎一足奈何啓視果失右足大驚束蒲補之說者以爲猶文山之見夢于髮繩也點埼亭集神道碑

句餘土音擬薤露詞

束蒲告吾友董給事歸魂

斷頭且不畏其餘更何有乃勞魂夢言束蒲告吾友或疑見未及然然抑否否君子重其死臨危終不苟是以仲夫子結纓始授首不見文丞相髮繩肯輕狃詎誇一足良或貽半人醜魂來鬼火青魂去刀山厚我友應斷腸生芻奠絮酒

詩話陸觀察周明以給事之柩歸給事以失足告次日開柩視之果失一足

馮王二公合葬墓

道光四年秋邑紳士數人至馬公橋謁三忠墓祇董給事公有碑石可認左右皆亂塚無從識馮王二公墓詢之士人云先代相傳董墓之右有人頭墳亦無從辨二公何左何右于是遂將二墓培土高大并爲一墳總豎石碑中題明字左寫兵部侍郎兼都察院簽都御史馮公右寫兵部侍郎兼都察院簽都御史王公居中再題同歸之墓四字庶使後人得以瞻拜云

### 灣頭義井

宋嘉定七年里人金世安建福海壽堂五世孫金澤就旁捨地穿井蓋亭以憇行者聞志

### 龍怒蕩村

### 四明談助

### 卷五

三十五

寧郡北郭外十里順治戊戌之秋村氓劇飲聞空中汲水聲出戶佇觀見龍摩霄行雨雪濤亂湧而上徒侶共揮手叱之殊犯龍怒倏然雲電四聚將一村飄蕩人畜多斃至筐筐已空猶封扃如故云簪雲樓雜記

### 郡厲壇

府城北門外三里明洪武三年建壇之東南立石刻御製祭文歲以清明中元十月朔迎城隍神位于壇榜無祀鬼神而癸之祭用羊三豕三飯米三石香燭酒紙隨用曹志

### 北津堰

北津在縣西北二里多歷年所外受江湖之衝木朽石頽秋潦至則鹵灌于河農以爲懼舟楫之往來者亦病之寶祐間

郡興工修理因舊增高內分兩傍各甃砌堰臂七層造屋四  
間是堰爲城西咽喉舊圖經又名北清舊有此堰蓄水以通城  
下濠池今湮永樂志堰之東有小徑由鄭公渡之江北可達定  
海澥浦里溪文溪等處敬止錄

袁陶軒鄧北雜詩

馬公橋畔冢累累江上三忠識者誰馮臂王頭同葬處新題  
獨有董君碑

馮侍郎京第臂董給事志寧柩皆葬馬公橋最後陸宇燦  
葬王侍郎翌頭于兩冢間鄞人稱三忠之墓見續耆舊傳  
今惟給事墓前新立碑

青葱蔬圃是灣頭彌望曾無隙地留蘿蔔才空又葱韭較量

四明談助

卷五

三十六

農畝孰多收

灣頭地不得空拔去蘿匐又種葱里諺也其利倍于農田  
李溪龍窟恐虛無未必龍遷雨澤枯神物去來原不測居人  
何事咎浮圖

縣西北包家嶼北抵李溪渡相傳有龍窟能興雨明時李  
姓族居造塔厭之龍遂他徙見嘉靖志順治間旱里人請  
毀塔不果康熙間又旱卒毀之見曹志

保豐碑

在縣北三里西管支港受它山林村兩路之水滿則洩之江  
若行春積瀆烏金諸碑相距不過數里惟石塘回環西北三  
十里間無一碑可以洩水每遇淫潦往往滙于城下反藉城

中三喉傳送三喉穴城爲水道僅通一綫所洩能幾此保豐  
礮之不可不復也先是宋淳祐辛丑叅政余天錫典鄉郡嘗  
有意經營好事者以風水之說阻之明年郡守陳塏究水利  
邦人脩述保豐興廢關鄉里豐歉乃相其故基爲民居所有  
尋督濠寨引繩度地以復之礮所不用者捐以予之且厚所  
犒由是爲閘兩間立石柱三造板橋于浦口以便行往民藉  
此礮之利則豐年可保故名保豐寶慶志建礮時應繇爲記記  
見敬止錄

宋開慶元年制府吳潛得水勢徑直之地于其右因廣其址  
改創爲五柱四門堅密雄偉雖湍流湧激不損更名永豐歲  
久復湮老人吳壽甫建言廢在城袞繡橋之石重加修理成化

按乾道圖經云城之河渠一水自它山而入南門一水自  
大雷而入西門潘潦泛溢則城之東北隅有礮以洩于江  
礮閘猶存二水之入城爲州民之利今猶昔也據此則知  
從前水自西南入城東北出城落江出入勢旺保豐礮本  
可不設卽云潦水必須分洩考當日所設之礮亦只有二  
門何後人不開城東北之礮反于此增至四門以致入城  
之水不旺城河穢濁不堪且據宋林元晉迴沙閘記云淳  
祐改元冬可齋陳公因連年失稔之故創礮一曰保豐復  
礮二曰斗門曰大河橋林是淳祐間人所言必實旣云陳  
公創立保豐礮從前本無是礮可知後人有心水利必將

城中經河并東北隅之磧開闊保豐磧修小使水道流通不至淤塞庶幾鄉城兩利

近有疑四明脉非從北郭入城之說謂吳制相開廣北郭磧則入城胛已開斷何以晚宋仍發不知開闊而不浚深則胛不斷但水泄太旺難免衰微耳所以賈相當國四明人一概不用直至明代始發而明之所以發者一由湯信國修復三磧使入城水旺一由目講師精于堪輿爲人營葬至成宏正嘉之間人才極盛然勢盛而衰之機已伏攷之成化志云今三磧久塞南北分泄行春保豐二磧則知此時水復入城不旺以致漸衰事之興廢亦有關於氣運也何疑之有

四明談助

卷五

三十八

忠佑廟

北門外保豐磧側晉建武初立賜今額俗稱北郭廟至正二十三年加封昌城武烈公

開志

袁菊村士元記曰鄞城北出門數百武踰保豐磧有古廟額曰忠佑神曰昌城侯歷世滋久揚靈愈昭城西北內外連薨聚居之民里社幾萬餘家歲時展事惟謹呂氏代爲廟史能歷紀其績以及歷代褒封之典列狀請記余領職翰林嘗附海舟知其靈因不辭按狀侯姓劉氏名植字伯先鉅鹿昌城人漢雲臺二十入將之驍騎將軍也光武中興嘗渡浙水至鄞則劉侯之揚靈茲土蓋其生前所涉効功之所建武初年寇犯郡城侯倏現旗纛雲霄中昭示雲臺將軍名號寇疑懼

而退由是威靈振揚郡守上聞封東晉護國昌城侯賜廟額忠佑俾民社得以展事後隆安間台寇孫恩復駕船千艘事抄掠侯乃現旗號如前寇方驚疑適大將軍劉裕兵至攻却之繼而百粵烏尾船入寇劉牢之將兵至以同胄出祭禱于神卽奏功旋師其効功于晉室而廟食者以此自侯廟所越江十里許爲慈谿縣境有驃騎將軍廟境人沙誠者負氣抗直人以權禁誣之義不屈辱卽含怒立死于驃騎廟中逮捕人至忽現相雲霄間恍惚聲呼曰我在此人咸驚異因像設于驃騎廟神事之人或走叩靈應特甚遠近聞者多迎致其神展奉于它祠我里大家白于官亦得像設于侯側東廡若從祀神宋宣和間封雲霄檢察使其神氣相爲感孚潛通默

四明談助

卷五

三十九

會相資以闡神用人固莫測其所以然也入我皇元神用尤彰舉其要者國家建都于燕多賴東南海漕以資頒祿巨浸茫茫四無畔岸或長風駕浪滔天沃日之勢智力所不能周惟倉卒叫號神明賴以善濟近中原路梗守臣役善水之卒倚舟楫爲通衢乃至元二十三年捆載之艘至雞鳴山連日颶風靄霧晦冥莫知向方漕臣棹夫同心叩禱神火徧現若自天降豁然開霽如夜斯曉旣達于京具辭上聞加封昌城劉侯武烈公沙使協佑侯廟額如故漕臣汪子美領命還鄞藩府俾礫牲致祭以慶褒嘉刻石以示將來余謂武烈公秉英靈瑰奇之氣于天生致侯封署勳雲臺沒而爲神顧乃廟食于海濱者三數千里舊涉之地歷千數百年累更世主乃

今加封進爵施及從類愈久彌彰致使枌榆之民歲時樂神之會相歡相屬和輯于隣井之間各安其業子孫保之公之惠不既多哉不但禦災捍患之在祀典而已也因摭廟史之詞爲記使刻諸石

萬季野竹枝詞

端公遺廟俯江流烟火千家祀事周漢室雲臺久寂寞獨留俎豆寄南州

詩注城北有劉端公廟相傳祀漢將劉植卽雲臺功臣之

一

袁陶軒鄮北雜詩

漁蕩紛紛比歲多秋來到處起漁歌使君廟望將軍廟海會

四明談助

卷五

四十

河通北斗河

吳使君廟在海會寺隔河忠佑廟舊稱劉將軍廟在北斗河永豐碑側里人奉此兩廟最虔漁蕩每歲得利廟中亦取一分非是卽納稅於官居人猶撓之也

暮秋勝事在中旬奔走城鄉各賽神吾里賽神兼賽富年年社火鬧江濱

九月中旬城鄉秋報爲燈會吾里最盛神姓沙元時封協佑侯附祀忠佑廟東廡別廟三相傳一木雕四像術者謂當分主貴富賤貧吾里祀富神也

北郭堰

北郭堰諸志俱不載閱宋以前志北門舊名鄭堰門知堰之

由來已久其制砌石爲之高與路平永固如斯不致崩塌洩水今東西兩鄉瀕江小戶廣設泥堰取水與堰平滿則任其溢出淺則更爲開低凡滿船貨物卽不起上亦易于車過但知肥己其于兩鄉水利爲害不淺

### 城北葉氏

甬上族望表城北葉氏武畧將軍紳諸生謙二望

### 武畧將軍葉紳

字朝佩其始祖自潛山以功賜爵世襲百戶來寧波居北郭武畧當嘉靖時海濱方有王直之亂寧波東隅日被兵城門晝閉浮梁中斷大吏僅保部內武畧憤甚出家財募死士爲禦賊計一日傳賊至開門叱纜徑渡遇賊先鋒于

### 四明談助

### 卷五

四十一

七里塾直前揮殺賊大創而兵不繼賊踵至武畧與二子俱死之詔晉其所襲爵爲千戶時武畧年僅三十六相傳其人放誕好飲博市廛中一旦臨大節始服其義

結埼亭集外編

### 葉處士謙

字天益崇禎時諸生曾祖武畧將軍紳死倭難遂世襲千戶至處士乃以儒學起而亦以國亡爵絕乙酉七月豫于江上之役由千戶晉都司丙戌六月喪職處士爲人跬步不妄工爲詩自謂忠節之後不肯屈身二姓當是時甬勾東遺民極盛而萬公亦多桐城方子留成都余生華亭宋菊齋皆重處士詩筒往來無日不相唱和顧蕉萃特甚所居不蔽風雨其徒或爲之謀徙宅則曰此所踐者先將

軍賜第之士也弗敢易一時遺民共爲賦城北破廬詩周鄧山過之歎曰昔人之稱東發一餐竟日不願長生今于天益見之時處士母在堂束脩所入不足供甘旨則稍爲人應詩文之請以潤筆然非其人不許也尋病瘡不起訣其母曰兒所恨者以母在也不然兒死晚矣無子葬于城北武畧將軍墓旁母後二年卒董佩公陸春明爲奉其母終身

結埼亭樂墓版文

嗚呼有明置衛于吾寧其官指揮者一十八姓最著爲萬氏其次爲施氏皆官至開府萬氏世以忠節理學經濟見施氏亦以詞章葉氏雖有武畧死事而門閥遠遜之國難而後萬氏有履安施氏有仲吳葉氏有先生其足以報國

四明談助

卷五

四十二

者三姓子弟而已萬氏子弟鵲起盛于本朝故聲光日以旁薄仲吳之馬革裹尸賴其甥爲鄭高州寒村至今世修祭祀故尙有知之者而先生之賚志而死孑然無後宗支又與世爵並斬吾鄉之人莫能舉其姓氏可爲痛哭者也

續者舊傳

城北破廬集已無傳附錄一首

佩公約同社爲予賦城北破廬詩予因以名其集卽次元韻奉答

孤兒慙愧項燕孫九死空餘散漫魂尺土早非南戒有一椽尙喜北墉存牆下蕨薇驚改井畹中蘭芷恥當門諸公厚意良難報且過荒齋話一尊

句餘土音擬薤露詞

故法服

葉處士□衣

先公故法服寶之已四葉試看紅猩猩映日光熠熠將無  
沙場血涵濡百年浹藐孫今白衣蕉萃一故裸裸間淋漓  
痕亦成紅褶疊

詩話葉先生天益在湖上七子中最早逝然其節最苦  
天益曾祖武畧將軍以勛籍殉倭難曬衣一節雖小然  
可想見其忠憤也

敬止錄採崇禎間承襲故冊云 葉驢兒南直潛山人初  
代父正充偽漢軍甲辰年子安慶歸附各處隨征洪武三  
十一年歷升寧波衛後所世百戶

四明談助

卷五

四十三

傳貴

茂

森

昇

盛

紳

嘉靖三十四年戰倭陣亡

世奇

以父陣亡

升世千戶